

EL SANTO EVANGELIO SEGUN SAN JUAN

Jesucristo rane ngue siqui nyii ra

1 ¹Dios cheẽ nane tuchi que nyii ra. Mbae ja si. Dios cheẽ ndei Jesús. ²Ae que siqui bei Dios rese ra. Dios si rei Jesús. ³Ae chõ ngue siqui bei Dios rese nyii ra. ⁴Dios que mbae chao eã ae ae ra. Jesús rese ae mbae ao ja nguiã. ⁵Jesús chõ mbia mingo nguiã ã. Nandemíngosa chõ nanderesae nguiã ã. ⁶Nandemíngosa chõ mbae tesae tuchi nguiã itondaru. Itondaru quia ra emungue aroneãte. ⁷Dios que emo mbu cote ra. Juan, i que ee ra. ⁸Juan ngue tu aba resaesa renei nenei mbia je ra. Mbia mbiirandu randu ja. I nda mbia aba resaesa icua ja, Juan ñee nguire. ⁹Aba resaesa eã ño Juan nde. Emo ñi ño Juan ndiqui nguiã ñee. —Ae chõ nanderesae nguiã co, i que Juan nda. ¹⁰Aba resaesa que tu ibi cote ra. Aba resaesa choñoã tuchi que ra. Ae chõ aba resae ja nguiã ã. ¹¹Aba resaesa que tu rei nguesenda mbirõ nda. Eresenda que eisiteã ñochi nguiã. ¹²Mbia mii mii ño ngue eisi turã turã nguiã. Mbia mii mii ño ngue eicua icua nguiã. Uquĩ je quia Dios riqui nguiã “seriirĩ” i. ¹³Mbia riirĩ na eã ño Dios riirĩ ndiqui nguiã nyaacuquia cuquia ã. Aque nyaacuquia rã eã ño Dios riirĩ ndiqui nguiã nyaacuquia cuquia ã cote. Sã emo ndiqui ngüinisi rese embiirĩ nae, uquĩ na eã ño Dios riirĩ ndiqui nguiã nyaacuquia cuquia ã. Dios ae chõ “seriirĩ” i nguiã ee Dios icua mose. ¹⁴Jesús rei Dios cheẽ. Jesús que tu mbiarã cote ra. Mbia tuchi que ae cote ra. Siqui que equia urerese cote ra. Echisaã turã ndese que ureico mae cote ra. Eturã tuchi chõ ae re. Ngu rã si chõ ae re. Ichõiñosa reã tuchi chõ ae re. ¹⁵Juan ngue Jesús senei senei nguia mbia je ra. —Co riĩ ngue acheẽ jêje resẽ. “Ae ra tu serui, aque quiarei ererecua tuchi sesi. Ae rane nguia siqui rei seã mose nyii”, ae rei que jêje resẽ. Ae siqui co cote, i que Juan mbia je ra. ¹⁶Jesús turã tuchi que ra. Nyebe eriqui nguiã mbae turã mee mee mbei nande je. ¹⁷Dios cheẽ mumbayã sacua ngue Moisés ñee ndei nguiã nande je. Jesús quiatu ngue

tu nguiã cote. Dios turã nenei nenei nande je. Jesús quiatu ngue Dios cheẽ ñoñoa senei senei nguiã nande je no. ¹⁸Emo maeãte Dios rese. Eriirĩ ae que nandembiirandu randu quia Dios rese ra. Eriirĩ nguiarei ngu rã si.

Juan el Bautista ñee turã Jesús riĩ

¹⁹Judíos Jerusalén jenda que mbia mondochoi ñee Juan je ra. Sacerdotes mondo eresa. Levitas mo ndese. —¿Aba nde re? i sacua Juan je. ²⁰Juan ngue ñee nyecua tuchi ee ra. —Christo eã ño se re, i que ee ra. ²¹—¿Abate nde re? ¿Elías chõ nde re? i que judíos chimondo ñeembe Juan je ra. —Tei. Elías eã ño se re, i que Juan ee ra. —Dios cheẽ mbuchecuaa ra tu, i equia nae, ¿ae chõ nde re? i que mbia ñee Juan je ra. —Tei, i que Juan ee ra. ²²Judíos chimondo que ñeembe Juan je ra. —Ndecheẽ embuchecua ure je. ¿Abate nde re? Ñnda ndecheẽ uresenei ñuquĩ je, ae urembu. ¿Mañi ure ra nderiĩ nde? i que Juan je ra. ²³Juan ngue ñee ee ra. —Tacheẽ jėje cote. Aba chõ se chã. Mbia amingo quiatu quiatu quia co. Ae ñee mombo mombote quia mbia je turuquia ite re nae, ae chõ se re. —“Ñeenda jembuquiche nandererecua mbaerã”, ae i quia, aque chõ se re, i que Juan nda. (Isaías chimbese rui si chõ Juan ñee nguiã.) ²⁴Ae ñee ñee nguiã Juan je nae, ñuquĩ ndei fariseos chimondo ñuquĩ. ²⁵Fariseos chimondo que ñee ee ra. —¿Mbaerã ereico bautizar i re? Cristo eã ño nde resẽ. Elías eã ño nde resẽ. Dios cheẽ mbuchecuaa eã ño nde resẽ, i que Juan je ra. ²⁶Juan ngue ñee ee ra. —I je chõ aico nguiã bautizar i. Emo nguiã siqui raque quia jēite re. Aque quia jēicuayãte nguiã co. ²⁷Enonde aico co. Aque ra tu serui. Ae quia ererecua tuchi sesi re. Erã si eã ño se re, i que Juan fariseos chimondo je ra.

Jesús rei oveja rã

²⁸Betábara, i que hue sucha je ra. Huee quia fariseos chimondo ñee nguiã Juan je. Ama Jordán ndobei. Ae Juan ndiqui bautizar i, huee. ²⁹Isamami nongue que Juan mae Jesús rese ra. Jesús que tu quia Juan ndiichã nda. —Co mbia icuã ndiquicharõ sacua ndu quia co. Oveja riirĩ na eriqui Dios je. Ae ra nandeicuã mbutiã nandesi. ³⁰Erĩ ngue aico ñee jėje. “Ae ra tu serui, aque quiarei ererecua tuchi sesi. Ae rane nguiã siqui rei seã mose nyii”, ae que se quia jėje. Co chi eru quia co cote. ³¹Se sí que aicuayãte nyii ra. I je que bautizar ae quia mbia je cote ra. Ñnda Israel jenda Cristo icua, i que Juan nda. ³²Juan ngue ñee mbei quia ra. —Espíritu Turã ndese que amae nda. Nguichi que u Jesús arõ nda. Nyurusĩ rã ngue eru nguichi earõ nda. Ibate si. ³³“¿Aba ra Cristo re?” ae beite que se quia ra. Dios que ñee seje ra. “I je eico bautizar i mbia je jē! Ae arõ nda Espíritu Turã ndu nguichi bei nae, ae quiatu bautizar i sacua mbia je Espíritu Turã je”, i que Dios seje ra. ³⁴Atea que se cote ra. Ae rei Dios riirĩ. Aicuate se cote, i que Juan nda.

Jesús mbia irabo uchimbaaquiaturā

³⁵Isamami nongue que Juan ndiqui hue sí no nda. Nguesenda nyeremo ndese que eriqui ra. ³⁶I que Jesús ucua quia ra. —Qui mbia icuā ndiquicharō sacuā coi quia qui. Oveja riirī na eriqui Dios je, i que Juan Jesús riī nda. ³⁷Juan ndesenda nyeremo ngue Juan ñee ñandu ra. Nyoī que Jesús rui cote ra. ³⁸Jesús que mae nguique qiti ra. —¿Mbae jēsequia quia re? i que mae erese ra. Ũquī ngue ñee Jesús je ra. —Mbia mbaaquiatusa, ¿ma ndechuchua ma nde? i que ee ra. ³⁹—Jenyu mae erese, i que Jesús ee ra. Nyoī que mae echuchua rese ra. Tenda nysecote mose que echoi erese ra. Tenda oso cheete que echi erese cote ra. ⁴⁰Ũquī nyeremo ngue Juan ñee ñandu ra. Siqui que Jesús rui cote ra. Andrés, i que ũquī mo je ra. Simón Pedro nongue que ae ra. ⁴¹Andrés que oso asite ngōngue requia ra. Simón ndequia. —Dios chimondo que uretea ra. Cristo que uretea ra, i que Andrés ngōngue je ra. ⁴²Andrés que ngōngue querao Jesús rea cote ra. Jesús que mae erese ra. Ñee ngue ee ra. —Simón ño nde re. Jonás ndiirī ño nde re. Cefas, i ra ndeje cote. Cefas, i chō Pedro re, i que Jesús ee ra.

Jesús Felipe irabo; Natanael abe

⁴³Isamami nongue que Jesús ñee nda. —Taso Galilea, i que ra. Ngasē ngue Felipe je ra. —Serui eico, i que ee ra. ⁴⁴Betsaida jenda que Felipe ra. Hue jenda sí chō Andrés re. Pedro rese. ⁴⁵Felipe que oso Natanael ndequia cote ra. —Ae riī Moisés riqui embesa mbesa cose, aque que uretea ra. Ae riī Dios cheē mbuchecua riqui embesa mbesa cose, aque que uretea cote ra. Jesús chō eriqui re. Nazaret jenda chō eriqui re. José riirī ño eriqui re, i que Felipe Natanael je ra. ⁴⁶Natanael que ñee Felipe je ra. —¿Mbae turā mo nda tu Nazaret jenda re? i que ra. —Echu erea ae, i que Felipe ee ra. ⁴⁷Natanael que tu Jesús riichā nda. Jesús que mae erese ra. —Co israelita turā tuchi mo ndu quia co. Aba mbirī irīsa reā tuchi mo ndu quia co, i que Jesús Natanael niī nda. ⁴⁸—¿Mañi ere quia seicuate re? i que Natanael Jesús je ra. —Amae ngue nderese ra. Felipe ‘quiatuchu’ i nonde ndeje. Iraqui re que amae nderese ra. Higo iqui re, i que Jesús ee ra. ⁴⁹Natanael que ñeembe ee ra. —Mbia mbaaquiatusa, Dios ndiirī ño nde riqui re. Israel jenda rerecua tuchi chō nde riqui re, i que Natanael Jesús je ra. ⁵⁰Jesús que ñee ee ra. —¿Seicuate se re? “Iraqui re que amae nderese ra”, ae que ndeje, ¿aque bei bei seicua quia co re? Mbae turā tuchi rese ra eremae cote, aque sí, i que Jesús Natanael je ra. ⁵¹Jesús que ñee si ee ra. —Tacheē nyecua jēje. Ibei ra obo jēje. Angeles nda nguichi quichi quia seje. Nyoī nyoī si ra equia ibate. Angeles ibatenda. Dios rimba. Jemae nda erese, i que Jesús ee ra.

Emo ngūinisirā nguereco

2 ¹Tres días mose que emo ngūinisirā isi ra. Galilea. Caná, i que hue sucha tubiriā je ra. Mbia que ñumunua nua fiesta raā ngūinisirā isi

mose ra. Jesús si abe que siqui huee ra. ²Jesús abe que siqui huee no nda. Uchimbaaquiatu rese. ³Mbia que uva rique mbei u huee ra. Ua jei que mbia je ra. Jesús si que ñee nda. —Uva rique que ua jeite ra, i que ñee Jesús je ra. ⁴Jesús que ñee ee ra. —¿Mbaerã ereico ñee seje ũquĩ nde, Tai? Achecua jei eã nda mbia je, i que Jesús usi je ra. ⁵Esi que ñee mbia rimba je ra. —iJesús cheẽ ndui si chõ jẽingo jẽ! i que ee ra. ⁶Cántaro atate que chi ra. Seis que cántaro ra. Síta ao ji. Ũquĩ jie que judíos riqui nyoĩ nyoĩ querabe ra. Ũquĩ cántaro jie que cien litros jaaja ra. ⁷Jesús que ñee mbia rimba je ra. —Cántaro jemombisẽ mbisẽ ja i je, i que Jesús ee ra. Nyebe emombisẽ ja nguiã. ⁸Jesús que ñeembe ee ra. —Embisengue jenyarabe jiri mondo fiesta raã naasa je, i que ee ra. Erimba que echara serao ee cote ra. ⁹Uva rique rã si chõ ngue i fiesta raã naasa je cote ra. Fiesta raã naasa que ubi erese ra. Eiranuã ngue ubi erese ra. Erimba achõ ño ngue jirandu ja nguiã. Ae ngüinisirã isi quia nae, aque je que fiesta raã naasa ñee nda. ¹⁰—Mbia ja quiarei uva rique turã nane mee mee nguiã mbia je querabe. Eturã mbei ja mose, ereã jiri mbei ruquia ruquia mbia je cote. Nde quia eturã tuchi ererecoquiatu nguiã. Hui bei sacua cote, i que ra. Jesús chisaã nii ño eriqui nguiã ñee. ¹¹Ũquĩ nane ngue Jesús saã mbia mae sayã nyii ra. Uva rique rã si tuchi que i raã nda. Ũquĩ ngue esaã Galiléaa eriqui mose ra. Caná, i que hue sucha tubiriã je ra. Hue rane ngue Jesús uquirãcuã ndeacuquia mbia je ra. Echimbaaquiatu que Jesús icua tuchi cote ra. ¹²Huesi que Jesús choi Capernaum nda. Usi rese. Ngõngue rese. Uchimbaaquiatu abe rese. Hue que echĩ itõ mocoite ra.

Jesús oso Dios chuchúaa

¹³Fiesta rurubite mose que Jesús si Jerusalén nda. Pascua, i que judíos aque fiesta je ra. ¹⁴Jesús que oso Dios chuchúaa ra. Huee que mbia chi ticuasú mee mee nyue mbae isiquia ribishorõ nda. Ovejas abe no. Nyurusí cuasu abe no. Emo ngue chi ngoi ra. Mbae isiquia que esibishorõ shorõ u ra. ¹⁵Mbia iruã nuãsa que Jesús saã nda. Esã nderecua. Aque je que Jesús mbia mbusẽ ja mondochoi Dios chuchua si ra. Ticuasú abe. Ovejas abe. Ae mbae isiquia sibishorõ shorõ nguiã, ũquĩ mbae abe que embuchiichere chere ja mesa ra. Mbae isiquia mombo mombo íbii. ¹⁶Ae nyurusí cuasu mee mee nguiã mbia je nae, ũquĩ je que Jesús ñee asite ra. —Á nyurusí cuasu jendao Dios chuchua si. Mbae isi isisa jësaã saã ñochĩ u Paba chuchúaa a, i que Jesús ñee ee ra. ¹⁷Jesús chimbaaquiatu que ndua ndua quia embesa ji rese ra. —Sebi tuchi ndechuchua, i que embesa ji huĩ nda. Ũquĩ ndese que echimbaaquiatu ndua ndua ra. Jesús mbia icuã mbusẽ mondochoi mose Dios chuchua si. ¹⁸Judíos que ñee Jesús je ra. —¿Ma mbia mae sayã nda eresaã ure je re? Ure ndeicua sacua. “Ererecua chõ eriqui re”, ure nda ndeje chã, i que judíos ñee Jesús je ra. ¹⁹Jesús que ñee ee ra. —Jẽ Dios chuchua mbutiã mose, asiquicharõ nda se. Tres días

mose ra asiquicharõ, i que Jesús ra. ²⁰Judíos que ñeembe Jesús je ra. — Tenda atate que nanderu riqui itõte Dios chuchua ao ao resẽ. Cuarenta y seis años. ¿Mañi ere ra tres días eao ja nde re? i que judíos Jesús je ra. ²¹Nguete riñ ngue Jesús riqui ñee nda. Mbia chumunuasa riñ eã ño ngue ñee nguiã. ²²Jesús quera si mose ramo ngue echimbaaquiatu ndua aque echeẽ ndese cote ra. Embesa ji rese ndua. —Ĩ nguia equia re, i que echimbaaquiatu ndua ndua cote ra. Jesús quera si mose.

Jesús mbia chiã icuate

²³Mbia tubiriã ngue Jesús icuate aque mose ra. Fiesta de la pascua mose. Siqui mose Jerusalén. Mbia mae sayã naa naa mose que mbia eicuate cote ra. ²⁴Jesús que mbia ndua ndua icuate quia ra. Nyebe ñee tuchi eã nguiã mbia je. ²⁵—Eĩ ño mbia nguiã ã, i aronea mbia mo Jesús mbiirandu. Jesús quiatu que mbia chiã icuate quia ra.

Nicodemo oso ñee Jesús je

3 ¹Mbia mo ngue siqui ra. Nicodemo, i que ee ra. Fariseo que ae ra. Judíos rerecua que ae ra. ²Itondaru mo ngue esi Jesús rea ra. — Mbia mbaaquiatusa chõ nde re. Dios chimbu chõ nde re. Ureicuate que ra. Mbia mae sayã nda mbia mo saã eã, Dios siquifã mose erese, i que Nicodemo Jesús je ra. ³Jesús que ñee ee ra. —Tacheẽ nyecua ndeje. Ae nyaacuquia si eã, ùquĩ nda siquifã Dios rese, i que Jesús ee ra. ⁴Nicodemo que ñee Jesús je ra. —¿Mañi nda mbia cuasu nyaacuquia si re? ¿Usi riequi rĩ nda esi si re? ¿Nyaacuquia si nonde re? i que Nicodemo Jesús je ra. ⁵Jesús que ñee ee ra. —Tacheẽ nyecua ndeje. Ae nyaacuquia i achõ je nae, ùquĩ nda siquifã Dios rese. Ae nyaacuquia Espíritu Turã abe je nae, ùquĩ nguia ra siqui Dios rese cote. ⁶Mbia nyaacuquia mose, mbia sí chõ eririĩ nde. Emo nyaacuquia mose Dios riirina, Dios rã si chõ eno nde. ⁷“Nducuã”, erechĩ nda secheẽ mose jẽ. “iJenyaacuquia si ja chõ jẽ!” se i mose. ⁸¿Mbaranguiti si quiririã ndiqui ichu re? ¿Mbaranguiti ra esi re? Ereicuayãte. Quiririã erechandu raque. Eremae áte erese. Eĩ si chõ Dios riiriĩ nde. Ae nyaacuquia Dios je nae, i que Jesús ee ra. ⁹—¿Mañi ùquĩ nde? i que Nicodemo Jesús je ra. ¹⁰Jesús que ñee ee ra. —¿Secheẽ ereicuayãte quia re? Mbia mbaaquiatusa raque nde. Judíos mbaaquiatusa raque nde. ¹¹Tacheẽ nyecua ndeje. Ae ureicua, ùquĩ ño uresenei senei ndei nguiã jẽje. Ae rese uremae, ùquĩ ño uresenei senei ndei nguiã jẽje. “Ichõiño nguiã”, jenze chõchĩ nguiã urecheẽ mose. ¹²“Ichõiño nguiã”, jenze chõchĩ nguiã secheẽ mose. Ibi jenda renei nenei mose jẽje. Secheẽ nda jemumba tuchi cote, ibatenda nenei nenei mose jẽje. ¹³Emo nguichiãte ibei si. Se miĩ ño ngue achu nguiã nguichi ibei si. Mbiarã ño ngue achu nguiã. Asobe ra ibei. Ibei jenda chõ se re. ¹⁴Sã Moisés mbei raanguia mbuchecua mbia je turuquia re cose no. Eĩ si ra mbia sembuchua

ira rese. ¹⁵Ĩ nda seicuasa quiachã eã mbei sesi. ĩ nda seicuasa siqui bei ibate serese.

Dios nyesecua ja mbia rese

¹⁶Dios que nyesecua tuchite mbia ja rese ra. Nyebe nguiirĩ mii mbu nguiã mbia je. Eriirĩ icua sa ra manoa. Siqui bei rae. ¹⁷Mbia mbasi sacuaã eã ngue Dios nguiirĩ mbu íbii ra. Mbia rirõ sacuaã mbae icuaã si quia ñi ngue Dios nguiirĩ mbu nguiã. ¹⁸“Eso tata cuasu”, i eã nda Dios nguiirĩ icuasa je. “Eso tata cuasu”, i Dios quia nguiirĩ icuasa reã je ã. Jesús icua eãte quia ñene. ¹⁹“Eso tata cuasu”, i Dios quia nguiirĩ icuasa reã je. Ebite quia ñi itondaru nyaashĩ si re. Nyaashĩ tu mose íbii, isiteã ngue ra. Mbae icuaã ndese quia eriqui beite nguiã. ²⁰Ae siqui beite quia mbae icuaã ndese, ũquĩ nguia siquichete nguiã nyaashĩ si. Nyaashĩ ndiichã sereãte quia ñene. “Ĩ nda mbia mae eã nandechisaã ndese mbae icuaã ndese”, i ñene. ²¹Ae mbae turã saã mbeite quia nae, ũquĩ nguiatu nyaashĩ siichã sete nguiã. ĩ nda echisaã saã nyecua mbia je. ĩ nda mbia ñee, “Dios quirãcuã nguia siquite nguiã erese”, i ra mbia ñee, i que Jesús ra.

Juan el Bautista ñee turã Jesús riĩ

²²Jesús que nyoĩ Judéaa cote ra. Uchĩmbaaquiato rese. Huee que eriqui mocoĩte ũquĩ ndese ra. Huee que eriqui bautizar i mbia je ra. ²³Juan abe que bautiza r i quia mbia je ra. Enón, i que sucha tubiriã je ra. Salim ndurubi que ra. Hue quiato ngue i tubiriãte re. Mbia que ngaẽ ngaẽ nguia erea ra. Juan ngue bautizar i quia ee ra. ²⁴Mbia Juan tarõ nonde mii ngue eriqui bautizar i huee nyii ra.

²⁵Judío mo ngue ñee icuaã icuaã Juan ñĩmbaaquiato je ra. Bautizar i riĩ. —¿Aba quia ra bautizar i mbia mbitirõ sacuaã nde? i que ñee icuaã icuaã nyue ra. ²⁶Nyebe Juan ñĩmbaaquiato nyoĩ nguiã ñee Juan je. —Ae rese ereico Ama Jordán ndobei, ae abe riqui bautizar i mbia je huee. Ae eresenei senei turã nguia ure je, aque. Mbia riqui tuchite erui ã, i que Juan ñĩmbaaquiato ñee ee ra. ²⁷Juan ngue ñee ee ra. —Coche ñene. Dios ibatenda quiarei. Emo siqui aroneate mbia rerecuarã, Dios emingo sereã mose. ²⁸Cristo tu nonde que Dios sembu resẽ. Mbae mbuquiche ja sacuaã Cristo tu nonde. “Cristo eã ño se resẽ”, ae checua rei que jẽje resẽ. ²⁹Jesús rui ra mbia siqui ja. Sã emo ngũinisirã nguereco no nae. Sã eninisi riqui ngu rese no. Sã eru quiato abe eya erese no. Eru quiato rã ño seya riqui Jesús rese co, mbia siqui mose erui. ³⁰Jesús quia ererecua tuchi riqui nguiã sesi co. Ererecua eã ño aico nguiã se co, i que Juan nda.

Jesús rei ibatenda

³¹Jesús rei ibatenda. Nyebe equiatio riqui nguiã mbia si co. Ibi jenda chõ nande re. Ibi jenda rese achõ ño nandeaquiato nande re. Ae quiarei

ibatenda. ³²Ibatenda umaesa senei senei nguia mbia je co. Ae echandu ibate nae, ũquĩ abe esenei senei nguia mbia je co. Mbia miĩ jiri riqui echeẽ andu andu ã. ³³Ũquĩ miĩ miĩ ño Jesús cheẽ isi turã nguĩã ã. Ũquĩ miĩ “Dios ichõĩñosa reã”, i tuchi nguĩã ã. ³⁴Dios quiatu que Jesús mbu ra. Nyebe Jesús riqui Dios cheẽ nenei nenei co. Dios que Espíritu Turã mondo tuchite Jesús je ra. ³⁵Jesús rese Paba riqui nyesequa tuchite co. Erucucha quia ae re. Nyebe Paba uquirãcuã mee tuchi nguĩã ee. Ñnda Jesús riqui mbae rerecuarã ja. ³⁶Ae Dios rucucha icua nae, ũquĩ nda siqui bei Dios rese. Ae Dios rucucha icuayã nae, ũquĩ nda siquĩã tuchi erese. Nyoĩ eã mbei ra ibate. Dios ra ũquĩ mondo tata cuásuu.

Jesús ñee acuanĩ mo je

4 ¹⁻²Mbia que siqui tuchite Jesús ruĩ cote ra. Bautizar i sacuã mbia je. Jesús sí que bautizar i eã nda. Echimbaaquiatu quia ngue bautizar i nguĩã ee. —Fariseos riqui ndeucuãyãte ã. Mbia siqui tuchi mose nderuĩ, i que mbia mo Jesús mbiirandu ra. ³Jesús jirandu mose que esi Judea recha cote ra. —Tasobe Galilea, i que ra. ⁴Samaria ni ngue esi ra. ⁵Ngasẽ ngue Samaria ra. Sucha tubiriã mo ngue ngasẽ nda. Sicar, i que hue je ra. Jacob chimee ibi ndurubite que huee ra. Ae emee nguiĩrĩ José je. ⁶Jacob chibicoĩ ibi que chĩ huee ra. Noria. Jesús que ngoi huĩ uquenea ucua huee ra. Noria ji. Tenda nandeite re mose. Ñeenda ishote que ee ra.

⁷⁻⁸Jesús ae que tiba huee ra. Echimbaaquiatu que nyoĩ sucha tubiriã nda. Mbae mo isi uchiurã. Acuanĩ mo ngue tu ngasẽ i rea huee ra. Samaria jenda que ae ra. —I embu rã. Tayu, i que Jesús ñee ee ra. ⁹Judíos que ñee eã mbei quia mbia Samaria jenda je querabe ra. Isho bei que eriqui nyesi ra. Nyebe acuanĩ ñee nguĩã Jesús je. —Judiate nde resẽ. ¿Mbaerã ereico ñee seje re? ¿Mbaerã ereico “i embu” i seje re? Samaria jenda chõ se resẽ, i que acuanĩ Jesús cheẽ ndibishorõ nda. ¹⁰Jesús que ñee ee cote ra. —Dios chimee ereicuayãte quia co. Co ereico seicuayãte co. Eĩ nda “i raanguia embu seje” ere rei seje. Seicua mose. Eĩ nda i mbia mingo beisa amee ndeje, i que Jesús acuanĩ je ra. ¹¹Acuanĩ ngue ñee si Jesús je ra. —Noria cuate nyeresẽ. I arasa ereru eãte quia a resẽ. Ma je quia ra i raanguia erechara seje. ¹²Nanderu ñiinda abe nda íu íu quia a yenda ye resẽ. Jacob. Nguiĩrĩ ndese. Erimba abe nda íu íu quia a yenda ye resẽ. ¿Ndeaquiatute ae si nde re? i que acuanĩ Jesús je ra. ¹³Jesús que ñee acuanĩ je ra. —Mbia íu mose a yenda jie, eisei jei chõ nda eno. ¹⁴Ae i raanguia mbei quia nae, ũquĩ nda eisei chiã mbei cote. I raanguia sechimee nguia ra siqui bei echiangui re. Uchi uchi bei ra equia echiangui re. Emingo bei sacuã, i que Jesús acuanĩ je ra. ¹⁵Acuanĩ ngue ñeembe Jesús je ra. —I raanguia embu nmbae seje no. Eĩ nda seisei chiã mbei. Eĩ nda achu achu eã a jenda ara, i que acuanĩ ee ra. ¹⁶—Eso nderu rea. Eru seje a, i que Jesús ee ra. ¹⁷—Seru eãte nyeresẽ, i que acuanĩ nda. Jesús que ñee ee ra. —Ae beite. Nderu eãte que ereico

namo co ra. ¹⁸Nderurã ngue eretea mocoĩte rei resẽ. Cinco. Ae erereco co nae, nderu tuchi eã ño aque re. Erecheẽ ñooño ãte rei nguiã seje a, i que Jesús acuani je ra. ¹⁹Jesús cheẽ mose que acuani ñeembe ee no nda. —Mbae mbuchecuaa nde reae. Dios resenda nde reae. ²⁰Ureramei nda ngaẽ ngaẽ nguia a ibi ato ra. Ñee ñee sacua Dios je. “Jerusalén quiatu mbia cheẽsa Dios je re” jenyẽ chõchĩ nguiã judíos, i que acuani Jesús je ra. ²¹Jesús que ñee acuani je ra. —Tacheẽ nyecua ndeje. Mangu choño ãte ra mbia ñee Dios je cote. Namu jiri. Jerusalén mii eã. A ibi ato mii eã no. ²²Jeñee mbeite raque equia Dios je ã. Dios icuare rocoĩ. Ure quia ureico nguiã Dios icuate ã. Judíos chõ ure re. Judío rei mbia rirõsa mbae icua si. ²³Namo jiri ra Dios quiatote ñee turã turã Dios riĩ uchiangui re. Mangu choñoa cote. Dios quiatote ra ñee turã bei quia Dios riĩ cote. Echeẽ nguire. ²⁴Dios rei espíritu. Mae aronea erese. Nandechiangui re chõ nandeco Dios andu ã. Nandechiangui re nandechẽ turã turã Dios riĩ. Dios cheẽ nguire, i que Jesús ra. ²⁵Acuani ngue ñee Jesús je ra. — Mesías ra tu ibate si. “Cristo”, i equia ee nae, aque ra tu íbii cote. Tu mose ra mbae mbuchecua ja mbia je. Ūquĩ aicuate quia co, i que acuani nda. ²⁶—Cristo chõ se re. Ae je ereico ñee, i que Jesús acuani je ra.

²⁷Aque mose que Jesús chĩmbaaquiato ngaẽ ngasẽ cote ra. —Jesús riquichĩ ñee acuani je a re, i que eu nyuruirate mae erese ra. —¿Mbae jenyẽ quia ñee nde? i eã ngue emo nda. Ireĩ ireĩte quiatu ngue ñee Jesús je re. ²⁸—Se rei Cristo, i mose que acuani ía tuchi ra. Ñio ngue esecha oso ra. Mbia mbiirandu randu sucha tubiriã jenda. ²⁹—A emo ndiqui a. Semumbusẽ ja que ra. Cristo chõ ae reae. Nyao rã mae erese, i que acuani mbia je ra. ³⁰Nyebe mbia nyoĩ ja nguiã ícuua. Jirandu mae Jesús rese. Acuani ñee nguire.

³¹—Mbae mo eu, i chiibe ibe que echimbaaquiato Jesús je ra. Acuani oso mose sucha tubiriã. ³²—Tei. Sechiu jëicuayãte jë, i que Jesús ee ra. ³³—Emo mbae mo queru echĩurã ndeae, i que echimbaaquiato ñee ñee nyue ra. ³⁴Jesús que ñee ee ra. —Ae riĩ Paba ñee seje nae, ũquĩ tasaã mbei quia ee. Paba cheẽ mumbayã mose, ũquĩ ño sechiu riqui nguiã. ³⁵“Pete mbae ishao shao ñi pe”, jenyẽ chõchĩ nguiã ã. Mbiaco yenda ea ireĩ ishao iriã na ño mbia riqui nguiã ã. Sã mbia riqui nyoĩ mbae a ishao shao no. Eĩ jenyẽ si chõ nguia nyoĩ mbia reru reru seje. Serese siqui sacua. ³⁶⁻³⁸Sã emo ndiqui mbae a ishao shao no. Sã mbae acha riqui mbae mondo mondo ee eishao shao ribishorõ no. Sã emo ndiqui mbae eĩ tiquia tiquia no. Sã emo ndiqui eishao shao equiche mose no. Eĩ si chõ secheẽ no nde. Sã emo ndiqui secheẽ nenei nenei nyii no. Aquere emo mbia reru reru seje no. Ae secheẽ nenei nenei quia nyii nae, ae mbia queru queru quia seje cote nae, ũquĩ ia jate nyiese cote. Ae emo ndiqui secheẽ nenei nenei nyii, huee jaemondo quia aque. Mbia reru reru sacua seje. Se mbia mingo bei sacua. Emo nane serenei nenei nguiã ee nyii. Jë jëingo ereru

reru seje ã cote. Jēya jate riqui jenyiese ã cote. Ae secheẽ nenei nenei quia nyii, ũquĩ ndese jēya jate, i que Jesús ra.

³⁹—Jesús que semumbusẽ ja ra, i que acuani ñee sucha tubiriã jenda je ra. Nyebe mbia tubiriã siqui nguiã Jesús rui hue jenda cote. ⁴⁰Samaria jenda que nyoĩ Jesús rea cote ra. —Eico are jiri ure rese, i que mbia Jesús je ra. Nyebe Jesús itõ nguiã nyeremo huee. ⁴¹Jesús sí que mbia mbaaquiato quiato cote ra. Nyebe mbia tubiriã siqui tuchi nguiã erui cote. ⁴²Mbia que ñee acuani je cote ra. —Nde chõ ngue urembiirandu rei nyii ra. Uremae ngue erese cote ra. Echeẽ ngue urechandu cote ra. Nyebe ureico nguiã eicua tuchi ã cote. Erecheẽ ñoñoa ngue ra. Cristo tuchi chõ ae re. Mbia rirõsa mbae icuã si chõ ae re, i que mbia ñee acuani je ra.

Jesús ererecua mo ndiirĩ mbucherõ

⁴³Huee que Jesús itõ nyeremo nda. Samáriaa. Hue si que esi si nyuruã Galilea quiti ra. ⁴⁴—Mbia ra Dios cheẽ nenei neneisa quereco turã eã hue jenda sí mose, i que Jesús nyii ra. Nyebe esi nguiã Galiléaa. ⁴⁵Jesús que ngasẽ Galiléaa cote ra. Mbia hue jenda que embucuasẽ turã nda. Mae nguiatu equia erese Jerusalén neaẽ. Pascua mose. Mbia mae sayã nguiatu ngue Jesús saã saã nguiã ee nyii. Nyebe eyate nguiã Jesús cuasẽ mose cote.

⁴⁶Jesús que oso si Caná de Galilea no nda. Ae eriqui i mbuchiicabo uva rique rã mbia je nyii nae, huee que esi si ra. Hue rurubi que ererecua mo ndiirĩ ndasi riqui ra. Capernaum, i que hue je ra. ⁴⁷—Jesús ru Judea si a cote, i que mbia ererecua mbiirandu ra. Nyebe ererecua si nguiã Jesús rea cote. —Seriirĩ chĩ mano serite qui. Nyao terembucherõ seje, i que ererecua ñee ee ra. ⁴⁸—Mbia mae sayã naa eã mose ra jẽ seicuayã ñochĩ nde, i que Jesús ee ra. ⁴⁹—Nyao jei rã. Seriirĩ nda mano nyee re, i que ererecua Jesús je ra. ⁵⁰—Esobe nyebi ndechuchúaa. Nderiirĩ ngue nyerõ nda, i que Jesús ee ra. —Jesús ñee ñoño aroneate, i que ererecua oso nyebi ra. ⁵¹Echuchua rurubi que erimba ngaẽ erobeishĩ ñee nda. —Nderiirĩ ngue nyerõte ra, i que ñee embiirandu ra. ⁵²—¿Ma tenda seriirĩ ngasi ucu re? i que ererecua ra. —Tenda nyiichere ramo mose que nderiirĩ ngacu ucu curi ra, i que mbia ñee ee ra. ⁵³—Hue tenda tuchi que Jesús ñee seje curi ra. “Nderiirĩ ngue nyerõ nda”, i seje curi, i que ererecua ra. Nyebe eriqui nguiã Jesús icua tuchi cote. Echuchua jenda abe que Jesús icua ja cote ra. ⁵⁴Judea si que Jesús ru Galiléaa ra. Mbia mae sayã nyeremo ngue Jesús saã Galilea jenda je ra. I que esaã uva riquerã nyii ra. Ererecua riirĩ ngue embucherõ namo no nda.

Jesús Amei mbucherõ

5 ¹Aquere que judíos mbae fiesta ra. Jesús que oso Jerusalén fiesta mose ra. ²Oveja iquesa que chĩ huee ra. Mbia icua abe que chĩ huee

ra. Cinco tei que chĩ hue eicua mama nda. Betesda, i que judíos hue mbia icua je ra. ³Mbia rasi que chi jate nyaara huee ra. Taiqui re. Eresayã. Ecuatayã. Echaacua. Mbia rasi chumumbara que chi huee ra. I rebera raarõ arõ. ⁴Angel mo nda nguichi quichi quia ra. I mumbera sacua mbia rasi je. —Ae rane nda ua ama ndebera mose nae, aque rane nda nyerõ, i que mbia ra. ⁵Amei ndasi ima mo ngue chi bei aque rĩ nda. Treinta y ocho años que amei ndasi ra. ⁶Aque que chi nyaara Jesús je ra. —Aa chõ erasi riqui bei a cose re, i que Jesús uchiangui re ra. —¿Erecherõ sete ere? i que ee ra. ⁷Amei ndasi que ñee ee ra. —Aba quia ra sembua i ye, i rebera mose. Mbia rane ngue secuã secuã nguia ra. I rebera mose, i que erasi Jesús je ra. ⁸Jesús que ñee ee ra. —Èhuã. Ndequisa erao. Eso, i que Jesús ee ra. ⁹Echeẽ mose que nyerõ nda. Uquisa que esirõ serao ra. Erasiã ngue oso cote ra. Sábado mose que Jesús embucherõ nda. ¹⁰Nyebe judíos paama i nguiã embucherõ mose sábado mose. —Co mose que mbia uquenea ucua ra. ¿Mbaerã nda ndequisa ererao re? i que judíos Jesús chimbucherõ je ra. ¹¹—Ae sembucherõ, aque que ñee seje ra: “Ndequisa erao. Eso”, i que sembucherõsa seje ra, i que judíos cheẽ mose ra. ¹²Judíos que ñee ee ra. —¿Aba aque re? ¿Aba “ndequisa erao”, i ndeje re? i que ra. ¹³—Aicua eãte se. Aba chõ sembucherõ. Mbia tubiriãte quiatu ngue re, i que erasi judíos je ra. Jesús oso rei. ¹⁴Emo mose que Jesús ngasembe uchimbucherõ je ra. Dios chuchúaa. Ñee ngue ee ra. —iSã jẽ! Arembucherõ ngue se resẽ. iMbae icua nda eresaã sichĩ jẽ! Mbae mo nda jeĩ tuchi ndeje cote, i que Jesús ee ra. ¹⁵Amei ngue oso judíos mbiirandu cote ra. —Jesús chõ sembucherõ nguia reaẽ, i que judíos je ra. ¹⁶Nyebe judíos paama i nguiã Jesús je. Nandeiquia, i. Sábado mose quia Jesús riqui nguiã mbia mbucherõ cherõ judíos je. Judíos uquenea ucua mose. Nyebe judíos paama i nguiã ee. ¹⁷Jesús que ñee judíos je cote ra. —Paba recoteã mbeite riqui co. Namõ abe. Se abe Paba rã si serecoteã teã mbeite riqui co, i que Jesús ee ra. ¹⁸Nyebe judíos riqui nguiã paama i tuchi Jesús je. Iquia serĩ serĩte que cote ra. Jesús que judíos cheẽ mumba mumba ra. Mbia rasi mbucherõ cherõ sábado mose. —Dios rã si aico co. Paba rei Dios, i que Jesús ra. Nyebe judíos paama i tuchi nguiã ee.

Jesús rei Dios rucucha

¹⁹Jesús que ñeembe judíos je ra. —Dios rucucha rei se. Dios rucucha ae ra mbae saã eã. Se ae ra mbae asaã eã. Paba chisaã ndese maende ae aico nguiã mbae raã naa se abe co. Ae Paba saã saã nguia, ùquĩ asaã saã ja quia se abe co. ²⁰Dios rucucha rei se. Paba riqui nyesequa tuchi serese co. Paba riqui uchiao reacuquia tuchi seje co. Uchiao ra eteacuquia tuchi seje cote. Mbia mae sayã tuchi. Jenyuruira tuchi ra mae erese cote. ²¹Paba mbia raaque mbuquera quera. Se abe ra mbia raaque ambuquera quera. Ae amingo bei sete, ùquĩ abe ra amingo bei. ²²Paba ra mbia mo mondo

eã tata cuásuu. “Nde chõ mbia equirirõ ndirõ mondo tata cuásuu”, i que Paba seje ra. ²³Ĩ nda mbia ñee turã seriĩ. Sã mbia riqui ñee turã Paba riĩ no. Ae ñee turã eã nguia seriĩ, ũquĩ ñee turã eãte Paba abe riĩ no. Dios rucucha rei se. Dios chimee ndei se. ²⁴Tacheẽ nyecua jêje. Secheẽ andusa ra siqui bei. Paba icuasa ra siqui bei. Nyoĩ eã mbei ra tata cuásuu. Paba ra emingo bei cote.

²⁵Tacheẽ nyecua jêje. Namõ jiri ra mbia raaque secheẽ andu. Secheẽ mumbasa reã nda siqui bei. ²⁶Paba quiarei mbia mingo beisa. Se abe rei mbia mingo beisa Paba rui si. ²⁷Se abe ra mbia amondo tata cuásuu. “Nde chõ mbia equirirõ ndirõ mondo tata cuásuu”, i que Paba seje ra. Se chĩ erucucha. ²⁸Ijenyuruĩra techĩ nda secheẽ mose jê! Mbiam raaque ra secheẽ ñandu ja chee. ²⁹Júã ja ra ngua si. Ae siqui turã, ũquĩ nda Dios mingo bei cote. Ae siqui icuã icuã nguia, ũquĩ nda nyoĩ tata cuásuu.

Seriĩ ño embesa ji ñee, i Jesús

³⁰Se ae ra mbae asaã eã. Paba cheẽ ndui si chõ aico nguiã mbiam mondo tata cuásuu. Paba cheẽ ndui si chõ aico nguiã mbiam mingo bei no. Paba cheẽ nda achabiã. Paba cheẽ nguire chõ aico nguiã mbae raã naa co. Se ae eã ño ñene. ³¹Se ae eã ño acheenei enei nguiã mbiam je co. Ĩ nda “ichõĩño” jenyere rei seje. ³²Aque emo ndiqui serenei nenei mbiam je aque. Aque eriqui ñee ñoño eã seriĩ aque. ³³Jemo ngue jemondo Juan je. Jẽirandu sacua serese. Juan ngue ñee ñoño eãte jêje ra. ³⁴Ae mbiam ñee ñee seriĩ, ũquĩ ñee ndeseã aico nguiã se. “Dios riirĩ eã ño co re”, i mose mbiam seriĩ, Dios riirĩ mbei chõ se re. Jẽicuã mbutiã sacua ño aico rei nguiã ñee jêje. ³⁵Tata rendi rã ndei Juan. Mbae resae ja raque. Huee que jengu mbirĩ ndei erese ra. Jẽhui jei chõchĩ esi. ³⁶Juan ñee ngue mbiam mbiirandu rei serese ra. Sechisaã nguia mbiam mbiirandu tuchi serese Juan ñee si. Dios cheẽ nguire ae aico nguiã mbae ao ao co. Sechisaã ndese mae jee mbiam jirandu nguiã serese cote. “Dios chimondo quiarei Jesús”, i mbiam cote. ³⁷Paba abe riqui serenei nenei mbiam je co. Paba cheẽ jeñanuate raque. Jemaẽ sayãte raque Paba no. ³⁸Jẽ nguia seicuayãte nguiã co. Paba chimondo chõ se re. Nyebe Paba cheẽ chĩ eãte jendese. ³⁹Embesa ji rese jẽingo mae tuchite raque. “Embesa ji ra nandemingo beite”, jenyechĩ nguiã. Serese jembiirandu sacua ño embesa ji re. Se quiatu mbiam mingosa tuchi re. ⁴⁰Jẽ nguia jẽingo sereãte nguiã serese. Ĩ nda se jaemingo beite rei. ⁴¹Jẽingo eã mose Dios rese, sebiãte jeñee turã turã mose seriĩ. ⁴²Co aico jẽicuate co resẽ. Jenyesequa eãte quia Dios rese co resẽ. ⁴³Paba que sembu resẽ. Jẽo eã ñochĩ serese. Paba chimondo eã tu mose, aque rese quia ra jẽo tuchite cote. ⁴⁴Mbiam resa rae jẽingochĩ nguiã jẽturã naa naa. Dios je quiarei jẽturã eãte. ¿Mañi jenyere quiatu ra equia seicua re? ⁴⁵Se quia ra jẽicuã ambuchecua eã Paba je. Moisés chimbese quia jẽicuã mbuchecua nguiã. “Moisés chimbese rei mbiam mingo beisa”, jenyechĩ

nguiã. ⁴⁶Moisés chimbesa jêicua eãte quia ã. Nyebe jêingo nguiã seicua eãte ã. Serîi ngue Moisés embesa ra. ⁴⁷“Nyia” jenyê eã mose Moisés chimbesa je, “nyia” jenyê eã nda secheê mose abe no, i que Jesús judfós je ra.

Jesús mbichae mbeta tuchi

6 ¹Aquere que Jesús choi ama ndisa rasa ra. Galilea, i que ama ndisa je ra. Tiberias, i abe que ee ra. Hue robei que echoi ra. ²Mbia que nyoî tuchite Jesús rui ra. Mbia mae sayã ngue Jesús saã saã nguia ra. Echisaã ndese que mbia mae mae nda. Mbia rasi mbucherõ cherõ mose. ³Sita ibate rî ngue Jesús choi ra. Huee que echî ngoi uchimbaaquiatu rese ra. ⁴Fiesta de pascua rurubi que ra. ⁵Mbia tubiriã ngue ngaê nguia Jesús rui ra. Jesús que mae erese ra. Ñee ngue Felipe je ra. —Mbia tubiriã tuchi. ¿Mangue ra echîurã nandeisi mangue re? i que Jesús ee ra. ⁶Jesús eicuate raque. —Mañi nda Felipe quia secheê mose reae, i que Jesús ra. ⁷Felipe que ñee ee ra. —Doscientos plata mbia chayâte mbia chiurã isi sacua. Echayã tuchite, i que Felipe ra. ⁸Andrés abe que chi ra. Jesús chimbaaquiatu. Simón Pedro nongue. Ae que ñee nda. ⁹—A ãquê mo ndiqui a. Cinco mbichae rerequia a. Sira nyeremo abe rerequia a. Echayâte quiatu nda re. Mbia tubiriâte quia ñene, i que Andrés Jesús je ra. ¹⁰—“Jengoi ja”, jenyê mbia je, i que Jesús ra. Quiata turã ngue huee ra. Quiata tose que mbia ngoi ja ra. Mbia cuabê. Cinco mil que mbia ra. ¹¹Jesús que mbichae isi cote ra. ãanye, i que ngu je cote ra. Mbichae riî. Mbichae que embuchao chao cote ra. Uchimbaaquiatu je que emondo mondo ra. Echimbaaquiatu que emondo mondo mbia je cote ra. Ae chi ngoi. Sira abe que embuchao chao mbia je ra. Mbia que eu ja ra. Mbia que echosei chiã chiã nyee ra. ¹²Mbia rio ja mose que Jesús ñee uchimbaaquiatu je cote ra. —iMbia chiû sique jemunua nua jê! iJendecoquiatu ja jê! i que ra. ¹³Echiû sique que emunua ja ra. Doce irairu que puk i ja ra. Mbichae sique sique. Cinco chõ ndei que mbichae nyii aê. ¹⁴Mbia que mae tuchi Jesús rese ra. Mbichae mbeta rese ra. Ûquî ndese que mbia riqui mae eã tuchi nyii ra. —Dios cheê nenei neneisa chõ co riqui re. Ae uresaarõ arõ nguia, ae chõ eriqui re, i que mbia Jesús riî nda.

¹⁵Jesús que mbia icua ra. —Mbia ra seisichî suruchoi ererecuarã nde, i que ra. Nyebe esi si nguia mbia recha. Sita ibate rî ngue esi erecha ra.

Jesús ngata i arõ

¹⁶Itondaru ndaru que Jesús chimbaaquiatu choi ama ndísaa ra. ¹⁷Nyui nyui que canoa ye cote ra. Aque echoichî nguia iasa Capernaum aque. Jesús que nyebi eã mbeite u ee ra. Itondaru chee. Nyoî chee que erecha ra. ¹⁸Quiririã ngue tu icuã icuã ee ra. Ama ndiite re mbia reco mose. I

rebera que tu asi asi tuchi ra. ¹⁹Mbia que nyoï choi bei canoa ye ra. Una legua. Jesús que canoa curubite cote ra. I arõ ngue esi quia ngata ra. Canoa yenda que mae erese ra. Echiã ngue cuaãcuã i tuchi ra. ²⁰—Se chõ nyeresẽ. ¿Mbaerã jëingo siquiche sesi re? i que Jesús ee ra. ²¹Canoa yenda que oote erese cote ra. Mbua que canoa ye ra. Ngasẽ asi que ecuaẽ fbii cote ra.

Mbia cuabẽ Jesús requia

²²Mbia cuabẽ ngue chi sobei ra. Isamami ngue Jesús tiãte ee ra. Nyebe ñee nguiã nyue. —Canoa miï ño ngue chi resẽ. Canoa ye eã ño Jesús si iasa resẽ. Echimbaaquiatu achõ ño ngue nyoï iasa canoa ye resẽ. ¿Mangue Jesús riqui mangue re? i que mbia cuabẽ u ñee Jesús requia ra. ²³Aque mose que canoa mo ngaẽ ngasẽ ee ra. Tiberias si que canoa cuaẽ nda. Mbia mbichae usa rurubi que ecuaẽ tiba ra. ²⁴Jesús tiã mbei que mbia je huee ra. Mbichae úsaa ra. Echimbaaquiatu abe tiã ngue mbia je ra. Nyebe mbia choi nguiã erequia canoa ye. Ngasẽ ngue coquimo cote ra. Capernaum, i que hue sucha je ra.

Mbichae rã ndei Jesús

²⁵Mbia cuabẽ ngue ngaẽ ama ndasa coquimo ngote ra. Ngasẽ ngue Jesús je cote ra. —Mbia mbaaquiatusa, ¿manose erechu ngasẽ aa re? i que mbia cuabẽ Jesús je ra. ²⁶Jesús que ñee ee ra. —Tacheẽ nyecua jêje. Se jembuquiarure chõ jëingo nguiã serese. Se jembiore chõ jëingo nguiã serese. Sechisaã icuare rocoï. Jemae sayã ngue asaã saã ndei quia resẽ. ²⁷Jenyiurã ndese jëingochi nguiã ndua tuchite. Uquï nda ua jeite. Ae ua eã mbeite quia, uquï ndese quiatu jendua. Mbia mingo beisa rese quiatu jendua. Se rei mbia mingo beisa. Se rei Dios rucucha. Paba que uquirãcuã mondo seje ra, i que Jesús ee ra. ²⁸Mbia que ñeembe Jesús je ra. —¿Mañi ure ra equia re? ¿Mbae rese ra aba riqui Dios mbia re? i que mbia Jesús je ra. ²⁹Jesús que ñeembe ee ra. —Dios que sembu ra. Seicua quia se. Seicua mose ra Dios ia tuchi jendese cote, i que Jesús mbia je ra. ³⁰—¿Mbae mo nda eresaã na ure je re, uremae sayã nde? Í nda uremae nderese. Eï ure ra ndeicua cote. ³¹Cose nda nanderamei ndiqui maná u u turuquia rĩ nda. Sã embesa ji no: “Dios que mbichae mbu ibei si mbia je ra”, sã embesa ji riqui i no, i que mbia Jesús je ra. ³²Jesús que ñee ee ra. —Tacheẽ nyecua jêje. Moisés eã ño ngue mbichae mondo nguiã mbia je ibei si. Paba chõ ngue emondo nguiã ibei si mbia je. Aque mbichae ra mbia mingo bei eã. Paba ra mbia mingo beisa mondo mbia je cote. ³³Dios riqui mbichae mbuae mondo mundo mbia je co. Ae Dios mondo mundo nguiã mbia je co nae, aque que tu ibei si ra. Aque rei mbia mingo beisa, i que Jesús ra. ³⁴Mbia que ñee Jesús je ra. —Aquembichae mbichae emondo mundo bei quia ure je, Urererecua, i que mbia Jesús je ra.

³⁵Jesús que ñee ee cote ra. —Mbichae rã ño se re. Mbia mingo beisa chõ se re. Serese siqui mose ra jeniãcuã eã mbei. Serese siqui mose ra jëisei eã mbei. Jëya bei rae. ³⁶Jemae ndei que equia serese resê. Seicuayã mbei chõchĩ nguiã ã. Acheẽ ndei que jëje nyii resê. ³⁷Ae Paba mee seje mbia nae, ũquĩ nda siqui bei serese. Ũquĩ nda aisi teã eã mbei. ³⁸Paba que sembu ibei si resê. Secheẽ nguire eã ño aico nguiã mbae raã naa. Paba cheẽ nguire ae chõ aico nguiã mbae raã naa co. ³⁹“Ae amondo ndeje nae, ũquĩ mo nda quiachãchĩ”, i que Paba seje ra. Ambuquera ja ra se, se tube mose íbii. ⁴⁰Se rei Dios rucucha. Paba que sembu ra. Ae seicuate nae, ũquĩ nda siqui bei. “Ũquĩ nda amingo bei”, i que Paba ra. Ũquĩ nda ambuquera ja, se tube mose íbii, i que Jesús ra.

⁴¹Judíos que paama i Jesús je ra. —Se rei mbichae rã. Ibei si que achu ra, i mose que judíos ñee icuã icuã Jesús je ra. ⁴²—Jesús chõ co re. José riĩrĩ ño co re. Eru rese que nandemae ndesê. Esi abe rese que nandemae ndesê. ¿Mbaerã eriquiñee nande je re? “Ibei si que achu ra”, i nande je re, i que mbia ñee ñee nyue ra. ⁴³Jesús que ñee ee cote ra. —¿Mbaerã jëingo ñee icuã icuã seriĩ nde? ⁴⁴Mbia ae ra siqui eã serese. Paba emingo mose serese, aque mose ra eriqui tuchi serese cote. Ũquĩ nda ambuquera si mingo sechube mose íbii. ⁴⁵“Dios ra mbia mbaaquiato ja”, sã embesa ji riqui i no. Nyebe ra Paba cheẽ andusa siqui bei serese. Nyebe ra Paba cheẽ mumbasa reã siqui bei serese. ⁴⁶Emo ngue mae eãte Paba rese ra. Se miĩ ño ngue amae erese ra. Esi chõ ngue achu resê. ⁴⁷Tacheẽ nyecua jëje. Ae seicuate quia nae, ũquĩ nda siqui bei. ⁴⁸Se rei mbichae rã. Mbia mingo beisa rei se. ⁴⁹Nanderamei ngue maná u u turã ndei quia turuquia re ra. Emo mose que mano mano ja ra. ⁵⁰Mbichae mbuae chõ asenei senei nguiã jëje co. Mbia mingo beisa rei mbichae mbuae. Aque que tu ibei si ra. Ae mbichae mbuae u nae, ũquĩ nda siqui bei. Ũquĩ nda ua eã mbei. ⁵¹Se rei mbichae. Ibei si que achu ra. Mbia mingo beisa rei se. Ae seu nae, ũquĩ nda siqui bei. Mbichae ra amee mbia mingo bei sacua. Aque mbichae rei serete sí. Seroo sí, i que Jesús judíos je ra.

⁵²Judíos que ñee icuã icuã nyue cote ra. —¿Mañi nda nguete mee nandechiurã nde? i que nyue ra. ⁵³Jesús que ñee ee cote ra. —Tacheẽ nyecua jëje. Mbiarã ngue achu ra. Serete jëu eã mose, jëingo bei eã ndae. Seruqui jembei eã mose, jëingo bei eã ndae. ⁵⁴Ae serete u quia nae, ũquĩ nda siqui bei. Ae seruqui mbei quia nae, ũquĩ nda siqui bei. Ũquĩ nda ambuquera si mingo, sechube mose íbii. ⁵⁵Serete rei mbia chiũ rã. Seruqui rei mbia chimbei rã. ⁵⁶Ae serete u quia nae, ae seruqui mbei quia nae, ũquĩ nda siqui bei sechiangui re. Se abe ra aico bei echiangui re. ⁵⁷Paba riqui bei co. Paba riqui semingo se abe co. Eĩ nda serete usa abe siqui bei. Amingo bei ra se. ⁵⁸Mbichae mbuae chõ asenei senei nguiã jëje co. Ae tu ibei si. Maná na eã ño aque mbichae re. Maná ngue nanderamei u u rei ra. Maná ngue mbia mingo bei eã nda. Emo mose que mano ja chõ

nda. Ae sechimee u quia nae, ũquĩ nguia ra siqui bei, i que Jesús judíos je ra. ⁵⁹Eĩ ngue Jesús quia judíos mbaaquiātu quiātu ra. Capernaum. Judíos chumunuásaa.

Mbia tubiriã hui Jesús si

⁶⁰Jesús cheẽ andusa que ñee tuchi nyue ra. —Mbaranguiatuã tuchi chõ Jesús cheẽ ndiqui re. Echeẽ nandemumba eã aroneate quiātu quia re, i que nyue ra. ⁶¹—Mbia riqui ñee icuã icuã tuchichĩ secheẽ nii, i que Jesús uchiangui re ra. Nyebe ucheẽ mbuchecua ee cote. —¿Mbaranguiatuãte secheẽ jêje re? ⁶²¿Mañi jenye ra mae mose serese re? Seso si mose ibate re. ⁶³Nande rete nandemingo eã nguia. Nande aĩ ño nandemingo nguia. Secheẽ nguia ra mbia mingo bei ibátee. ⁶⁴Seicua ja eãte quiātu nguia ã. Jemo seicua eãte quia ã, i que Jesús ee ra. Mbae ao ramo mosenda bei que Jesús mbia icua uchiangui re ra. —Ã nda seicua. Ã nda seicua eã. Co ra semondo mbia icuã je, i que Jesús mbia icua uchiangui re nyii ra. ⁶⁵—Acheẽ ngue jêje nyii, ũquĩ sí aico ñee jêje a. Mbia ae ra siqui eã serese. Paba emingo mose serese, aque mose ra eriqui tuchi serese cote, i que Jesús ra.

⁶⁶Aque mosebe bei que mbia tubiriã hui Jesús si cote ra. Ae siqui erese nyii nae, ũquĩ mo ngue hui ja esi cote ra. Ngatayã ngue equia erui cote ra. ⁶⁷Jesús que ñee uchimbaaquiātu je cote ra. Doce je. —¿Jẽ abe ra jêhui sesi re? i que uchimbaaquiātu je ra. ⁶⁸Simón Pedro que ñee ee ra. —Tei, Urererecua. Aba rui quia ra ureico cote. Ndecheẽ ño mbia mingo beisa resẽ. ⁶⁹Ureico ndeicua ã cote. Cristo rei nde. Dios rucucha rei nde, i que Pedro ra. ⁷⁰Jesús que ñee ee cote ra. —Jẽ doce que jaẽirabo rei ra. Sechimbaaquiātu sacua. Jemo ngue diablo rã nda, i que ra. ⁷¹Judas Iscariote riĩ ngue eriqui ñee nda. Diablo, i. Simón ndiirĩ ndei Judas. Ae quia Jesús mee nguia mbia icuã je. Jesús chimbaaquiātu mo ndaque.

Jesús nongue siquiã Jesús rese

7 ¹—Jesús nandeiquia, i rei que judíos quia ñee ñee nyue ra. Nyebe Jesús si eã nguia Judea cote. Galilea bei que eriqui ngata ra. ²Fiesta rurubi mose que cote ra. Tuchua ñetẽ ngue judíos saã saã mbei quia aque fiesta mose ra. Curubite que cote ra. ³Jesús nongue que ñee ja ee ra. —Eso rã Judea. Ì nda ndechimbaaquiātu mae ja ndechisaã ndese Judea jenda. ⁴iMbae esaã nyecua chõ mbia resa rae jê! Ì nda mbia ndeicua ja. Co ereico mbia mae sayã naa naa co. Mbia resa rae quiātu esaã saã, i que enongue ee ra. ⁵Jesús nongue abe que Jesús icuayãte ra. Nyia, i eã Jesús cheẽ je. ⁶Jesús que ñee ee cote ra. —Emo mose quia ra aso nyecua mbia je cote. Jẽ jẽso jẽ ae ae, jẽsose mose. ⁷Dios cheẽ mumbasa riqui jêcuayã eãte raque jẽ. Se quia eriqui nguia seucuayãte ã. “Jenyisaã saã nguia eicuãte riqui nguia”, ae quiātu nguia ee co. Nyebe eriqui nguia

seucuayãe ã. ⁸Jẽ ño jẽso fiesta rea. Se ra asoã. Emo mose quia nda achecua nguiã mbia je cote, i que Jesús ngõngue je ra. ⁹Jesús que siqui are jiri Galilea cote ra.

Jesús mbia mbaaquiatu quiatu fiesta mose

¹⁰Jesús nongue que nyoï fiesta rea cote ra. Aquere que Jesús abe si mingue cote ra. Ngasẽ nyecuayã ño ngue oso ra. —Mbia ra jiranduchĩ serese re, i que uchiangui re ra. ¹¹Judíos rerecua que Jesús sequia sequia ja u ra. —¿Ma Jesús riqui ma nde? i ja que fiesta mose ra. ¹²Mbia que ñee ata atate Jesús rĩĩ nda. —Jesús turãte que, i que emo emo nda. —Jesús turã eã ngue ra. Mbia mbiĩrĩ irĩte que equia no nda, i que emo emo no nda. ¹³Mbia que siquichete judíos rerecua si ra. Nyebe mbia ucheẽ mbuchecua eã nguiã Jesús rĩĩ.

¹⁴Fiesta ite mose que Jesús si Dios chuchua mbia mbaaquiatu quiatu cote ra. ¹⁵Judíos que nyuruira tuchi Jesús cheẽ andu ra. —Eaquiatute quia eriqui re. ¿Mangue eriqui ñimbaaquiatu mangue nyii re? i que mbia ra. ¹⁶Jesús que ñee ee ra. —Secheẽ ae eã asenei senei nguiã jẽje co. Paba cheẽ ño asenei senei nguiã jẽje. Ae sembu. ¹⁷Emo siquise mose Dios cheẽ ndui, aque ra Dios cheẽ icua tuchi. Aque ra ñee. “Ucheẽ ño eã Jesús senei senei nguiã mbia je co. Dios cheẽ ño esenei senei nguiã mbia je co”, i ra aque ñee serĩĩ. ¹⁸“iSã mbia ñee turã mbe i serĩĩ jê!” i ra emo ucheẽ achõ nenei nenei. “iSã mbia ñee turã mbeĩ Dios rĩĩ nguiatu jê!” ae chõ nguiã Dios cheẽ nenei nenei se co. Acheẽ ñooño eã ño nguiã co. Mbia ambiĩrĩ irĩ eã ño nguiã co. ¹⁹Moisés que Dios cheẽ mbesa rei nande je ra. Nande emumbayã sacua. Jẽ nguiã rei Dios cheẽ mumba. ¿Mbaerã jẽingo seiquia serĩte re? i que Jesús ee ra. ²⁰Mbia que ñee ee cote ra. —Emo ndiqui ndeiquia serĩ eãte co. Aba checuayã icuã ae nemiicuã ndeae, i que mbia Jesús je ra. ²¹Jesús que ñee ee cote ra. —Mbia rasi mo ngue ambucherõ sábadó mose. Aque miĩ ño ngue asaã ndei nguiã. Aque miĩ je chõ jẽingochĩ nguiã nyuruirate mae serese. ²²Moisés que circuncisión teacuquia jẽje ra. Nanderamei nane ngue circuncisión saã nguiĩrĩ je ra. Nyebe jẽingo nguiã sábadó mose abe circuncisión naa naa jendiĩrĩ je. ²³Moisés cheẽ nguire chõ jẽingo nguiã circuncisión naa naa jendiĩrĩ je ã. Sábado mose abe. ¿Mbaerã jẽingo paama i seje mbia mbucherõ mose sábadó mose re? ²⁴“Aque eicuãte”, jenyje jei chõchĩ nguiã. Jẽirandu turã na erese nyii, i que Jesús ee ra.

Ibatenda chõ se re, i Jesús

²⁵Jerusalén jenda que ñee ñee Jesús rĩĩ cote ra. —A Jesús riqui ñee mbia je a. ¿Nandererecua ra Jesús iquia eã si chõ nde? ²⁶A eñi nyecua ñee mbia ite re a. Nandererecua ñee eã tuchi chõchĩ ee. Teachõ tuchi chõchĩ. ¿Cristo eriqui reĩ nandererecua je re? ²⁷Cristo eã ño Jesús re.

Galilea jenda chõ ae re. Cristo tu mose quiatu ra nandeiranuate. Ma si chõ nda eru, i que Jerusalén jenda ñee nda. ²⁸Jesús que echeẽ ñandu ja ra. Dios chuchúaa eriqui mose mbia mbaaquiato quiatu. Nyebe Jesús echeẽ ndibishorõ nguiã cote. —¿Ma si achu co re? ¿Jẽ seicuate re? Se ae achu eã nguiã co. Sembu ji ae aico nguiã co. Ichõñosa reã ae ngue sembu nguiã. Ae rese jemae áte nae, ae chõ sembu nguiã. ²⁹Se ae que amae erese ra. Esi que achu ra. Ae chõ sembu nguiã co, i que Jesús ee ra. ³⁰Mbia que paama i Jesús cheẽ mose ra. —Jesús nandeisi etarõ sacua, i rei que mbia ñee nyue ra. Ae mbia eisiã ño nguiã. —Aque mose ra eremano, i áte quiarei Dios ee. ³¹Mbia tubiriã ngue Jesús icua icua ramo nguiã cote ra. Nguerecuarã. —Cristo tuchi rei co. Co eriqui mbia mae sayã naa naa tuchi co. Emo aquiato mo nda tuãte rei. Co mihi tuchi chõ ndei Dios chimbu co, i que mbia tubiriã nguiã ñee ñee Jesús rihi nda.

Fariseos paama i Jesús je

³²Fariseos que nyiisaquia mbia cheẽ ndese ra. Mbia ñee turã turã mose Jesús rihi. Nyebe fariseos paama i nguiã Jesús je. Policía jenda mo ngue emondo rei Jesús isi sacua nda. Sacerdote rerecua abe que policía jenda mondo rei Jesús isi sacua nda. ³³Jesús que ñee nda. —Aico mbihi ño nguiã jendese a cote. Aquere ra aso si Paba rea. Ae sembu. ³⁴Jẽ nda serequia cote. Serea eãte ra se cote. Ae ra aso nae, huee jengasẽ aroneate, i que Jesús ee ra. ³⁵Judíos que ñee nyue ra. —Manguiti ra esi reae. Manguiti ra nandecuasẽ aroneate ee reae. Judíos siqui quia griegos rese nae, ùquĩ ndea ra esi reae. Griegos mbaaquiato sacua ndeae. ³⁶“Serequia ra se cote. Serea eãte ra se. Ae ra aso nae, huee jengasẽ aroneate”, i chõchĩ nguiã nande je. ¿Mbaerã eriqui ñee nande je ùquĩ nde? i que judíos u ñee nyue ra.

Jesús icuasa rei i riõ na

³⁷Fiesta ua nonde que mbia ñumunua tuchi cote ra. Fiesta mumba bei. Aque mose que Jesús ñi juã ñee mbia ite re ra. —“Emo isei mose, sã eru serea. Ambiu ra se. ³⁸Ae ra seicua nae, i riõ na nda ùquĩ. Iãcuã turã na nda ùquĩ”, sã embesa ji riqui i no, i que Jesus ucheẽ mbirãtãte mbia je ra. ³⁹—Ae ra seicua nae, ùquĩ je ra Espiritu Turã amondo, i ñene. Espiritu Turã mbu nonde chõ eriqui nguiã ñee. Jesús oso eã mose ibate chõ eriqui nguiã ñee.

Mbia ñee atate Jesús rihi

⁴⁰Mbia tubiriã ngue chi Jesús cheẽ andu ra. Ùquĩ mo ngue ñee nyue ra. —Co rei Dios cheẽ nenei neneisa co. Ae uresaarõ arõ nguiã co, i que u ñee Jesús rihi nda. ⁴¹Emo emo ngue ñee nda. —Co rei Cristo tuchi co, i que ra. Emo emo ngue echeẽ sibi shorõ no nda. —Tei. ¿Mañi nda Galilea

jenda Cristo re? Hue jenda eã ño nda Cristo ndesẽ. ⁴²“David riirĩ nda Cristo. Belén jenda ra Cristo, David rã si”, sã embesa ji riqui i no, i que mbia ñee ñee nyue ra. ⁴³Hue rĩ ja mbia ñee eãchĩ Jesús riĩ. Mbia que ñee ata ata Jesús riĩ nda. ⁴⁴—Jesús nandeisi serao tarõ, i rei que emo emo ñee nda. Isiã si que ra.

Fariseos Jesús icuayã

⁴⁵Policía jenda ochi que nyoi nyebi fariseos je cote ra. Sacerdotes rerecua je abe nyebi. —¿Mbaerã Jesús jendu eã ure je re? i que ererecua policía jenda je ra. ⁴⁶Policía jenda que ñee ee ra. —Aque Jesús riqui mbia mbaaquiato turã tuchi aque. Ae rã si emo mbia mbaaquiato turã aronea, i que policía jenda ñee mbia rerecua je ra. ⁴⁷Fariseos que ñee policía jenda je cote ra. —¿Jẽ abe chee chõ Jesús jembiiĩrĩ irĩ nguia re? ⁴⁸Nandererecua mo ngue “coche rei” iã tuchi Jesús je resẽ. Fariseos mo abe que “coche rei” iã tuchi Jesús je resẽ. ⁴⁹Ã mbia ataque riqui Dios cheẽ icua eãte ã. Quiachã ja ra Dios si, siqui mose Jesús rese, i rei que fariseos ra. ⁵⁰Nicodemo abe rei fariseo. Ae tu Jesús je isa nae, aque que ñee fariseos je ra. Uataque je ra. ⁵¹—Emo nandembasi mbasi chooño aroneate. Echeẽ nandechandu rane nguiatu. Nandeirandu ja rã nguiatu erese. Embasi nonde. Eĩ ngue Moisés embesa miĩ nande je ra, i que Nicodemo uataque je ra. ⁵²Fariseos que ñee ee cote ra. —¿Nde abe chõ Galilea jenda Jesús rese re? Embesa ji rese emae mae. Dios cheẽ nenei neneisa mo eãte que Galilea jenda resẽ, i rei que fariseos ñee asi Nicodemo je ra. ⁵³Mbia que nyoi ja uchuchua cote ra.

Cuña mo siqui emo ndu rese

8 ¹Jesús que oso Monte de los Olivos ra. ²Isamami ngue Jesús si nyebi si Dios chuchúaa ra. Eresaitõ ndabe. Mbia que esiichã tuchi ra. Jesús que ngoi ra. Mbia mbaaquiato quiatu. ³Fariseos que cuña mo curucuaẽ Jesús je ra. Embesasa rese que cuña ndurucuaẽ ee ra. Cuña nda siqui emo ndu rese mbia je ra. Mbia ite re que fariseos cuña miĩ nda. ⁴Ae cuña curucuaẽ nae, ûquĩ ngue ñee Jesús je ra. —Urembaaquiatusa, mbia que mae cuña ndese ra. Emo ndu rese siqui mose. ⁵Moisés que ñee nande je ra. “Ã jëiquia sita je”, i que Moisés quia ã mbia riĩ nda. ¿Mañi ere ra ã nii ñee nde re? i que cuña ndurucuaẽsa ñee Jesús je ra. ⁶—Jesús nandembiiĩrĩ. Ĩ nda ñee icuã. Ĩ nda mbia nandembiiicua Jesús je cote, ichõ equia nyii reaẽ. Nyebe cuña ndurucuaẽchĩ ee reaẽ. Jesús que nyatiquio chõ nda. Ibi que embesa mbesa o je ra. ⁷—¿Mañi ere ra nde cuña je re? i bei que mbia quia Jesús je ra. Jesús que juã ñee mbia je cote ra. —Jemo turã mbeite mose, sã aque rane cuña chei sita je, i que Jesús ee ra. ⁸Nyatiquio si que ibi mbesa ra. ⁹Jesús cheẽ andu mose que mbia rerecua ireĩ ireĩ ja chõ nda. —Nandeicua jate que, i ja chõ ngue ñee uchiangui

re ra. Nyebe echoi nguiã usê ja. Amei nane ja que ra. Eataque quia usê nguiã erui cote. Ererecua que usê ja ra. Jesús ae que siquichõ nda. Cuña ndesechõ. ¹⁰Jesús que juã mbia rerecua ruibe cote ra. Cuña je que ñee cote ra. —¿Ma nderurucuaësa ma nde? “Nandechei rã sita je”, ¿iãte emo nguia nderĩ co re? i que Jesús ñee cuña je ra. ¹¹—Tei. Emo ñeeãte, Sererecua, i que cuña Jesús je ra. Jesús que ñee ee cote ra. —Se abe ra acheẽ eã ndeje. Eso rei. iMbae icuã nda eresaã sichĩ jê! i que Jesús cuña je ra.

Tata rendi rã ndei Jesús

¹²Jesús que ñee si mbia je ra. —Mbia ja mbaaquiatusa chõ se re. Tata rendi rã ño aico nguiã mbia je co. Ae siqui serui nae, ùquĩ nda siquiã itondáruu. Ûquĩ amingo bei quia querabe co, i que Jesús mbia mbaaquiato ra. ¹³Fariseos que ñee Jesús je cote ra. —Ndechue chõ ereico nguiã ñee mbia je. Nyebe mbia “coche rei” i aronea ndechêe je, i que fariseos ñee Jesús je ra. ¹⁴Jesús que ñee echeẽ ndibishorõ nda. —Sechue acheẽ ndaque mbia je. “iAe bei jê!” i chõ mbite raque aba secheẽ mose. Ae si achu nae, huee jêicuayãte. Ae ra aso nae, hue abe ra jêicuayãte no. Se ae aicua nguiã co. ¹⁵Jeñee icuã jei chõchĩ nguiã aba riĩ. Mbae mumbusê ja mose rocoĩ. Eĩ ae eã ño nguiã se. ¹⁶“Co eicuãte”, ae eã nguiã se ae co. Paba rese chõ aico nguiã mbia mumbusê ja co. Nyebe aico nguiã ñee Paba cheẽ ndui si co. ¹⁷“Mbia nyeremo ñee mose hue rĩ si, ‘ae beite’ jenyê chõ”, i que Moisés jêje ra. ¹⁸Sã ure nyeremo ure no. Paba rese. Ae sembu. Sã ureico ñee seriĩ Paba rese no. Ure nyeremo, i que Jesús fariseos je ra. ¹⁹—¿Ma nderu riqui ma nde? i que fariseos Jesús je ra. Jesús que ñee ee ra. —Paba jêicuayãte quia ã. Se abe seicuayãte quia ã. Jê seicua mose, Paba abe ra jêicua, i que Jesús ra. ²⁰Eĩ ngue Jesús quia mbia mbaaquiato quiato Dios chuchúaa ra. Ofrenda no nosa jii que eriqui mbia mbaaquiato quiato ra. Emo ngue Jesús isi ãte etarõ sacuã nda. —Aque mose ra eremano, i ãte quiarei Dios ee.

Aso si ra ibate Paba rea, i Jesús

²¹Jesús que ñee si fariseos je ra. —Aso si ra Paba rea cote. Serequia requia rei nda se re. Jêicuã mbei ra jemano nyee. Ae ra aso nae, huee jengasê aroneate, i que Jesús ee ra. ²²Judíos que ñee ñee nyue ra. —¿Mbaerã nda nandecuasê aroneate ee re? Nyiiquia ra reae, i rei que ñee nyue ra. ²³Jesús que ñee ee ra. —Ibi jenda chõ jê nde. Ibatenda chõ se re. Ibi jenda eã ño se re. ²⁴Nyebe aico nguiã ñee jêje nyii. “Jêicuã mbei ra jemano nyee”, ae que jêje nyii. Seicuayã mbei mose ra jemano nyee jêicuã mosebe, i que Jesús ee ra. ²⁵—¿Aba tuchi nde re? i que mbia Jesús je ra. Jesús que ñee ee ra. —Cose ndare bei chõ aico nguiã serenei nenei jêje co. ²⁶Mbae ra asenei tuchi jêje reae. Secheẽ nda jêicuã mbuchecua tuchi

jêje. Ae sembu nae, aque quiarei ñee ñooño aronea. Echeẽ ngue achandu ra. Ae cheẽ ño asenei senei mbei nguiã mbia je co, i que Jesús mbia je ra. ²⁷Mbia rerecua que Jesús cheẽ icuayã mbei ra. —Dios riĩ ño eriqui nguiã ñee, iã mbei que mbia ra. ²⁸Jesús que ñeembe ee ra. —Mbiarã ngue achu ra. Jê nda sembucha ira rese cote. Aque mose ra mbae jêicua jiri seriĩ cote. “Dios cheẽ nguire chõ eriqui mbia mbaaquiato quiatu re”, jenye ra seriĩ cote. “Dios rucucha chõ eriqui re”, jenye ra seriĩ cote. ²⁹Ae sembu nae, aque riqui bei serese co. Echeẽ nguire aico bei embia co. Nyebe eriqui nguiã serechayã mbei co, i que Jesús ra. ³⁰Jesús cheẽ mose que mbia Jesús icua icua cote ra.

Jêingo bei mose serui, sechimbaaquiato tuchi chõ jê nde

³¹Ae Jesús icua quia judíos nae, ùqui je que Jesús ñee nda. —Secheẽ si jêhui eã mose, sechimbaaquiaturã tuchi ra jê. ³²Jê nda ichõiñoso reã jêicua tuchi cote. Mbia icuã nderecua rimba eã nda jê cote, i que Jesús ee ra. ³³Mbia que ñee Jesús je ra. —Abraham nducucha rei ure. Mbia mo nimba eã mbei que ureico resẽ. ¿Mbaerã ereico ñee ure je re? “Mbia si taembui mingo cote”, i ure je re, i que mbia Jesús je ra.

³⁴Jesús que ñee ee cote ra. —Ae mbae icuã saã saã nguia nae, ùqui ndiqui bei eicuã nimbarã ã. ³⁵Erimba ra siqui bei eã nguerecua rese. Nguiirĩ tuchi quiatu ra equereco bei nyiese. ³⁶Se jembui mose mbae icuã si, eicuã nimbarã eã nda jêingo cote. ³⁷Abraham nducucha raque jê. Ûqui aicuate raque. ã jêingo secheẽ isi turã eãte ã. Secheẽ jêucuayã nguia ã. Nyebe jêingo nguiã seiquia serite ã. ³⁸Ae Paba teacuquia seje nae, ùqui ño asenei senei nguiã jêje co. Ae jendu teacuquia jêje nae, ùqui ndese chõ jêingo nguiã jê ã no, i que Jesús ee ra.

³⁹—Abraham ño ureru resẽ. Urei resẽ, i que mbia Jesús je ra. Jesús que ñee ee cote ra. —Abraham nducucha turã mose jê, eĩ nguia nda jêingo turã nguiã ña. Abraham ndui si. ⁴⁰Dios que sembaaquiato ra. Dios quiarei ñee ñooño eã. Echeẽ ño asenei senei nguiã jêje co. Ûqui je chõ jêingo nguiã seiquia serite ã. I ãte que Abraham quia seje ra. ⁴¹Jendu rã si chõ jêingo nguiã ã, i que Jesús ee ra. Mbia que ñee Jesús je cote ra. —Ureru ata ata eãte nyeresẽ. Dios miĩ ño ureru re, i que ñee Jesús je ra. ⁴²Jesús que ñeembe ee ra. —Dios jendu tuchi mose, eĩ nguia nda jêingo nguiã nyesequa serese chã. Ae quiarei sembu. Se ae eã achu nguiã. ⁴³ã jêingo secheẽ andu sereãte ã. Nyebe jêingo nguiã secheẽ icua aroneate ã. ⁴⁴Aba checuayã nderecua rei jendu. Erese bei chõ jêingo nguiã ã. Echeẽ jemumbayã mbei chõ nguiã ã. Mbia iquia iquiasa bei que ae ra. Cose ndare mosenda bei. Ñee ñooñosa reã quiato aronea tuchi quiarei ae. Ñee ñooño mbeite equia co. Ucheẽ achõ ño esenei senei nguiã mbia mbiĩĩĩ irĩ querabe co. Ñee ñooñosa rerecua chõ aque re. ⁴⁵Se quia acheẽ ñooño ãte rei nguiã jêje. Secheẽ jêucuayãte chõchĩ nguiã. ⁴⁶Mbae icuã ngue asaã

eâte ra. Ûquĩ jêicuante raque. Acheẽ ñooño aite sequia co resẽ. ¿Mbaerã jêingo secheẽ andu sereã neate ã nde? ⁴⁷Dios quiato quia Dios cheẽ ñandu turã nguiã. Dios quiato eã ño jẽ nde. Nyebe jêingo nguiã Dios cheẽ andu sereãte ã, i que Jesús mbia je ra.

Jesús rane siqui Abraham si nyii

⁴⁸Judíos que ñee si Jesús je ra. “Samaria jenda chõ nde reae. Aba checuayã nyireco chõ nde reae”, ure que nderiĩ nda. ¿Ae tuchi nde re? i que judíos ñee Jesús je ra. ⁴⁹Jesús que ñee ee ra. —Aba checuayã nyireco eã ño se resẽ. Co aico ñee turã tuchi Paba riĩ co resẽ. Jẽ nguia jeñee icuã mbeite nguiã seriĩ. ⁵⁰“iSã mbia ñee turã seriĩ jê!” ae eã ño nguiã se co. Paba quia siqui nguiã ñee turã turãte seriĩ co. Ae quia ra mbia icuã mbasi. ⁵¹Tacheẽ nyecua jêje. Ae secheẽ mumbayã nguia nae, ùquĩ nda amingo bei. Ûquĩ nda manoã mbei, i que Jesús ra. ⁵²Judíos que ñee Jesús je ra. —Aba checuayã nyireco tuchi chõ ereico nguiã co. ¿Mbaerã ereico ñee nde? “Mbia ra manoã, secheẽ mumbayã mose”, i re. Abraham ngue mano. Nandei. Dios cheẽ nenei neneisa que mano ja resẽ. ⁵³¿Nde ndequiatu tuchi Abraham si re? Ae chee que mano. Dios cheẽ nenei neneisa chee que mano. ¿Abate nde re? “Mbia ra manoã”, ere chõte equia co, i que judíos Jesús je ra. ⁵⁴Jesús que ñee ee cote ra. Se ae secheẽ turã mose seriĩ, mbia ra seanduchõ. Paba quia ñee turã mbei nguiã seriĩ co. Ae je jêingo ñee. “Dios urererecua” i raque eriĩ. ⁵⁵¿Jêingo Dios icuayãte ã. Se quia aicuate nguiã co. “Dios aicuayã”, se i mose, eĩ nda acheẽ ñooñote rei jê na si. Dios aicua tuchite. Echeẽ ndui chõ aico bei nguiã co. ⁵⁶Abraham ngue seraarõ arõ mbei quia ra. “Tu rae”, i bei que equia ñimbia seriĩ nda. Secuasẽ mose que eyate mae serese cote ra, i que Jesús mbia je ra. ⁵⁷Mbia que ñee Jesús je ra. —Cosete que Abraham mano ndesẽ. ¿Mañi ere mae erese re? Cincuenta años eâte nde resẽ, i que ra. ⁵⁸Jesús que ñee ee ra. —Tacheẽ nyecua jêje. Cose ndare bei chõ aico nguiã co. Abraham tiã mosenda bei, i que Jesús ra. ⁵⁹—iSita je Jesús nandechi jê! i rei que mbia sita isi isi ra. Jesús que ñimi ñimi oso ra. Usẽ Dios chuchua si.

Jesús emo ndesayã mbucherõ

9 ¹Ñeenda rui que Jesús mae emo ndesayã ndese ra. Echaacuquia mosenda bei que eresayã nyobei ra. ²Jesús chimbbaaquiatu que ñee ee ra. —Urembaaquiatusa, ¿abate mbae icuã saã nyii re? Co resayã nonde re. Eru ereae. Esi ere no ae. Ae si ere no ae. ¿Abate ere? i que Jesús je ra. ³Jesús que ñee ee ra. —Tei. Emo ngue mbae icuã saã eâte rei ra. Mbia ra mae ja Dios quirãcuã ndese chã. Embucherõ mose. Nyebe eresayã nyaacuquia nguiã. ⁴Arõ ño nandeico nguiã mbae raã naa. Itondaru mose, mbae rese nandeico aroneãte cote. Nyebe aico bei nguiã mbae rese Paba

je co. Semano mose quia aico aroneãte nguiã mbae rese íbii cote. ⁵Seico mose íbii, aico mbia resaete co, i que Jesús ra. ⁶Jesús que ñinimbu íbii cote ra. Tuchu que esaã ngüendi je ra. Nguiti que eresayã ndesa rese cote ra. ⁷—Eso nderuba irei cote. Ama Siloé eso eirei, i que Jesús eresayã je ra. (“Echimondo”, i chõ nguiã Siloé je.) Eresayã ngue oso nguesa irei huee ra. Obei que eru quia mae turã cote ra. ⁸Hue jenda que nyuruirra jate mae erese ra. Ae mae nguia erese nyii nae, ùquĩ ngue nyuruirra tuchi mae erese cote ra. Eresa cherõ mose. —¿Co resayã ño ache ache i quia nyii re? ¿Ae chõ ere? i que mbia ñee ñee nyue ra. ⁹—Ae eã ño ñene, i que emo nda. —Ae chõ ñene, i que emo emo no nda. Eresayã ngue ñee cote ra. —Se chõ nyeresẽ, i que ñee mbia je ra. ¹⁰—¿Mañi nderesayã mae nde? i que mbia ee ra. ¹¹Eresayã ngue ñee nda. —Ae eriqui “Jesús” i nae, aque que tuchu saã nda. Nguiti que seresa rese ra. “Eso nderuba irei Ama Siloé”, i que seje cote ra. Aso que se ra. Seruba irei ji que amae cote ra, i que eresayã mbia je ra. ¹²—¿Ma nderesa mbucherõsa riqui ma nde? i que mbia eresayã je ra. —Qui chõ esi, i que ee ra.

Fariseos ñee eresayã je

¹³Mbia que eresayã curuchoi fariseos je cote ra. ¹⁴Ae mose Jesús eresayã mbucherõ nae, sábado mose que ra. Tuchu que esaã, aque mose que ra. ¹⁵—¿Mañi ere nderesa ira re? i que fariseos ee ra. —Tuchu que equiti seresa rese ra. Ae seresa airei nguiã. Co aico mae co cote, i que eresayã nda. ¹⁶Fariseos mo ngue ñee nyue ra. —Ae eresa mbucherõ sábado mose nae, Dios cheẽ nenei neneisa eã ño aque re, i rei que nyue ra. Emo emo ngue ñee no nda. —Eĩ nguia nda eicuã mose mbia mae sayã naa naa eã nguiã nande je chã, i que fariseos mo ñee nyue ra. Hue rĩ ja eã ngue fariseos ñee Jesús rĩ nda. ¹⁷Fariseos que ñee si eresayã je ra. —Ae nembucherõ nae, ¿mañi ee re? ¿Mañi ere quia nde eriĩ co re? i que ra. Eresayã ngue ñee nda. —Dios chimondo que ae ra, i que eresayã nda.

¹⁸Judíos que echeẽ ñandu sereã nda. Eresa turã mbei mo eriqui reĩ nguiã ee. Nyebe “jenyu” i nguiã eresayã ndu je. Esi je abe no. —Nandeirandu rã erese, i que ra. ¹⁹—¿Co nderiĩrĩ co re? ¿Eresayã nyobei nyii re? ¿Eresayã nyaacuquia nyii re? ¿Mbae emumae nguia co cote re? i que ñee eru je ra. Esi je abe. ²⁰Eru que ñee ee ra. —Co rei seriĩrĩ co. Eresayã ngue nyaacuquia rei ra. ²¹Mañi ño equia mae co cote. Aba chõ embucherõ. Ureicuayãte. Jeñee nguia ee. Etiarõte nyeresẽ. Ae ra ñee jėje, i que eru ñee judio rerecua je ra. Esi abe. ²²Judíos rerecua quia ñee nguia nyue nyii reaẽ. —Emo ñee turã mose Jesús rĩ, ùquĩ nandemombo bei mbia chumunuasa si. “Dios chimbu rei Jesús”, i mose, nandemombo bei mbia chumunuasa si, i quia ererecua quia ñee nyue nyii reaẽ. Nyebe eresayandu siquichete nguiã ñee turã Jesús rĩ. Esi abe no. ²³Nyebe eru riqui nguiã ñee ererecua je. —Jeñee nguia seriĩrĩ je. Etiarõte nyeresẽ, i ee. Esiquichete quia ñene.

24—Quiatuchu, i si que judíos rerecua eresayã je no nda. —Echeẽ turã Dios mii je. ¡Jesús abe je ra erecheẽ turãchĩ jẽ! Eicuãte ae resẽ, i rei que judíos rerecua eresayã je ra. 25Eresayã ngue ñee ee ra. —Aicuayãte se. Eicuãte ereae. Eaturãte ere no ae. Aicuayãte se. Seresayã ngue nyii ra. Co aico mae co cote. Ũquĩ mii ño aicua nguiã co, i que eresayã judíos rerecua je ra. 26—¿Mañi equia ndeje re? ¿Mañi nderesayã ira re? i si que eresayã je no nda. 27Eresayã ngue ñeembe ererecua je ra. —Acheẽ ndei que jẽje resẽ. Secheẽ ngue jemumb resẽ. ¿Mbaerã jẽingo “echeembe” i seje ã nde? ¿Jẽ abe jẽingose rete sembucherõsa rui re? i que eresayã judíos rerecua je ra. 28Ererecua que ñee icuãte ee cote ra. —Ae rui chõ ereicochĩ nguiã nde co. Moisés rui chõ ureico nguiã ure ã. 29Moisés je quiatu que Dios ñee nyii resẽ. Ũquĩ ño ureicua nguiã ã. Ae nembucherõ nae, ma si quiatu ñi ae ru. Ae quia ureicuayãte nguiã, i que judíos rerecua ra. 30Eresayã ngue ñee ee ra. —Seresa que embucherõ ndesẽ. “Dios chimbu”, jenye eã ñochĩ equia ã. Seresa mbucherõsa raque ae. 31Dios ra mbia icuã ñee ñianuã. Ae Dios cheẽ mumbayã nguia nae, ũquĩ ñee nguia ra Dios ñandu. 32Seresayã ngue achaacuquia rei nyii ra. Ae que sembucherõ nda. Emo abe ra ũquĩ saã eã. 33Dios chimbu eã mose, eĩ nguia nda mbae raã eãte nguiã ña, i que eresayã judíos rerecua je ra. 34Judíos rerecua que ñee eresayã je ra. —Ndechaacuquia mosenda bei chõ ndeicuã ndiqui nguiã co. ¿Mbaerã ereico urembaaquiatu sete re? i que judíos rerecua eresayã je ra. Nyebe que judíos rerecua eresayã mombo bei judíos chumunuasa si cote ra.

Ureaquiatute ure, i chõchĩ fariseos

35Jesús que jirandu erese ra. Emombo mose. Nyebe esi nguiã ñee eresayã je. —¿Dios rucucha ereicuate quia co re? i que ee ra. 36—¿Aba chõ Dios rucucha re? Aicua sete quia co, i que eresayã nda. 37—Ae chõ se resẽ. Ae je chõ ereã ñee a resẽ. Eremae ndei serese resẽ, i que Jesús ee ra. 38Eresayã ngue ngoi ngũĩã ndese Jesús ji cote ra. —Areicua tuchi se cote, i que Jesús je ra. 39Jesús que ñee ee ra. —Achu que íbii ra. Mbia icuã mbuchecua mbia je ra. Achu que eresayã ndesa mumae mae nda. Ae eresa nae, ũquĩ mumae eã sacua abe que achu ra, i que ra. 40Fariseos mo abe que chi hue ra. Jesús cheẽ andu que ñee Jesús je ra. —¿Urereresayã ureico ure abe ã nde? i que fariseos ee ra. 41Jesús que ñee ee ra. —Jendesayã mose, eĩ nda jẽicuã ambuchecuayã ndei. “Seaquiatute”, jenyechĩ equia ã. Nyebe aico nguiã jẽicuã mbuchecua jẽje co, i que Jesús judíos rerecua je ra.

Ovejas ucha cheẽ icuate

10 1Jesús que ñee nda. —Tacheẽ nyecua jẽje. Ae iqueã nguia oveja chiquesa rĩ nae, mbae mbuquiachãsa chõ ũquĩ nde. Echiquesa eã

ñi ique ique mose. ²Ae ique ique quia oveja chiquesa rĩ nae, aque quia oveja raarõsa aque re. ³Ae echiquesa saarõ nguia nae, aque ra echiquesa equia oveja raarõsa je cote. Eique sacuã. Oveja raarõsa cheẽ nda oveja icua ja. Ñee miĩ miĩ nda umbae oveja je. Oveja icua ja. Ae ra oveja nyoi usẽ erui. ⁴Eraarõsa embusẽ ja mose etaronda si, ae rane nda ngata oso quia erẽta. Oveja ra nyoi ja quia erui. Echeẽ nguia eicuate nguia. ⁵Emo ndui ra echoi eã. Uchã ño nda emo si. Echeẽ nguia eicuayãte nguia, i que Jesús ñee nda. ⁶Jesús que eĩ ndei ñee fariseos je ra. Ejemplo je. Oveja renei nenei ee. Jesús cheẽ andusa que echeẽ icuayãte ra.

Jesús rei oveja raarõsa

⁷Jesús que ñee si ee ra. —Tacheẽ nyecua jẽje. Oveja chiquesa rã ño se re. ⁸Ae ngaẽ senonde nyii nae, mbae mbuquiachãsa ja chõ ùquĩ nde. Nyebe ovejas eche siichã eã nguia. ⁹Oveja chiquesa chõ se re. Ae seicua quia nae, ùquĩ nda ateaquiatu bei mingo. Sã oveja mo ndiqui oso quiaru quiaru no. Sã eriqui cuaẽ nyebi chebi bei utaronda no. Eĩ si ra seicua quia siqui bei serese. ¹⁰Mbae mbuquiachãsa quia ra tu mbae rirõ sacuã. Mbae mbutiã sacuã. Mbae iquia sacuã. Se quia ni achu nguia mbia mingo bei sacuã. Mbia mbia tuchi nonde que achu ra. ¹¹Oveja raarõsa rei se. Ovejas ateaquiatu bei quia co. Amano nda emingo bei sacuã. ¹²Ae ovejacha eã nae, aque ra ovejas saarõ ndaque, saarõ turã eã ndae. Uchã ño nda nyacua tu mose ovejas je. Nyacua ra ovejas isi embuquiachamba u quia. ¹³“Echa eã ndei se re”, i ra eraarõsa uchã erecha. Esiquiche mose. Oveja raarõ turã eã. ¹⁴⁻¹⁵Se quiarei oveja raarõsa turã. Sã Paba riqui seicuate co no. Sã aico Paba icuate se abe co no. Eĩ ae chõ nguia oveja icua sembae co no. Sembae abe seicua quia ã. Sembae ovejas mingo bei sacuã nda amano. ¹⁶Ovejas mo abe que sembae no nda. A jenda eã ño ùquĩ nde. ùquĩ abe ra aru a. ùquĩ nda secheẽ mumbayã no. Sembae oveja ra chi ja serese cote. Se miĩ ño nda asaarõ ja cote. ¹⁷Sesiquiche eã semana ndese. Sembae ovejas mingo sacuã. Nyebe Paba iate riqui nguia serese co. Semanonde ra aquera si. ¹⁸Semano sereã mose, eĩ nda mbia seiquia aroneate rei. Se ae chõ amanosete nguia mbia je. Se ae chõ nda aquera si no. Paba quia uquirãcuã meete nguia seje, i que Jesús mbia je ra.

¹⁹Judíos que ñee ata atate nyue ra. Jesús cheẽ mose. Hue rĩ si ñee ja eã. ²⁰—Aba checuayã siquite Jesús rese co resẽ. ¿Mbaerã jẽingo echeẽ andu re? i que emo emo uataque je ra. ²¹Emo emo ngue ñee no nda. —Ae rese aba checuayã ndiqui nae, ùquĩ nda ñee turã eã ndesẽ. Aba checuayã nda mbia resayã mbucherõ eã ndesẽ, i que emo emo no nda.

Judíos Jesús oseĩ chiã

²²Mbia que ñumunua nua nguia Jerusalén cote ra. Dios chuchua ao mosenda ndese ndua ndua. Nyiiseĩte que aque mose ra. ²³Jesús que oso

Dios chuchúaa ra. Portal de Salomón ngue eriqui ngata ra. ²⁴Judíos que ngaẽ Jesús mama nda. Ñee ngue ee ra. —Ureico ndeicuayãte ã. ¿Manosete ra erecheẽ tuchi ure je re? Nde riĩ. Echimbu checua jiri ure je. Nde Cristo mose, ndecheẽ embuchecua ure je, i que judíos ñee Jesús je ra. ²⁵Jesús que ñee ee ra. —Acheẽ ndei que jêje resẽ. Secheẽ jẽãnuã ño nguiã ã. Paba quirãcuã je chõ aico nguiã mbia mae sayã naa naa co. ã ndese mae nda seicua nguiã ña. ²⁶Acheẽ ndei que jêje nyii resẽ. Serimba eã ño jẽ nde. Nyebe jẽingo nguiã secheẽ anuã. ²⁷Serimba secheẽ icua ja quia ã. Serimba aicua ja quia ã. Serui ja serimba riqui ã. ²⁸Serimba amingo bei quia co. Serimba ra quiachã eã mbei. Emo eisi aronea tuchi sesi. ²⁹Paba que emee serimbarã nda. Emo eisi aroneate Paba o si. Ae quiarei equirãcuã tuchi. ³⁰Aque miĩ ño ureico nguiã ã. Paba rese. Eĩ si tuchi ureico nguiã ã, i que Jesús ee ra.

³¹Nyebe judíos paama i nguiã ee. Sita que esirõ sirõ nda. —Jesús nandechei, i rei que ra. ³²Jesús que ñee ee ra. —Paba que sembuquirãcuã tuchi ra. Nyebe jemae sayã asaã saã tuchi nguiã jêje. ¿Ūquĩ mo nii jẽingo “nandechei” i seje re? i que Jesús judíos je ra. ³³Judíos que ñee Jesús je ra. —Ndechiao turã mo je eã ño ureico nguiã “nandechei” i ndeje. Erecheẽ icuãte que Dios riĩ ndesẽ. Dios eresaã saãte quia ure je co resẽ. Mbia si chõ ndaque nde, i que judíos Jesús je ra. ³⁴Jesús que ñee ee ra. —Sã embesa ji riqui i no: “Jẽ ndei dioses, i que Dios ra”, sã embesa ji riqui i no. ³⁵Embesa ji ñeeñoño aronea. “Dioses rei jẽ”, i que Dios ucheẽ nenei neneisa je ra. ³⁶Dios que seirabo ra. Sembu que íbii cote ra. ¿Mbaerã jẽingo paama i secheẽ mose re? “Dios riirĩ ño se re”, i mose re. “Ndeicuãte chõchĩ Dios je”, jenyẽ chõchĩ nguiã seje. ³⁷Se mbae raã naa eã mose Paba rã si, ūquĩ mose quia secheẽ jeãnuã. ³⁸Paba rã si mose, “coche ñene” jenyẽ chõ sechisaã je. Secheẽ jeãandu sereã ndaque. Paba riqui serese co. Se abe aico Paba rese co. Ūquĩ nda jêicua cote, “coche ñene” i mose sechisaã je, i que Jesús ee ra. ³⁹—Jesús nanderao etarõ sacua, i rei que mbia ra. Jesús que oso chee hue si ra.

⁴⁰Jesús que oso Ama Jordán ndobei ra. Ae Juan ndiqui bautizar i nyii nae, huee que esi ra. Huee que Jesús riqui arete cote ra. ⁴¹Mbia que nyoĩ nyoĩ tuchite erea huee ra. Ñee ñee ngue nyue ra. —Juan ngue nandemae sayã mo saã eãte rei nande je. Nandembiirandu turã tuchichĩ Jesús riĩ. Ichõĩño eã ño equia ñee nande je reaẽ, i que mbia ñee nyue ra. ⁴²Mbia tubiriã ngue Jesús icuua huee ra.

Lázaro mano

11 ¹Emo ndasi que chi ra. Lázaro, i que ee ra. María, i que enongue je ra. Marta, i que enongue je no nda. Echari ja que ūquĩ nda. Betania jenda ja que ūquĩ nda. ²María rei aba mbushimbusa ichusẽsa Jesús i rese. Ua je que esi esi ra. Enongue quia erasi re. Lázaro, i que

ee ra. ³Nyebe echari mbia mo mondo nguiã Jesús mbiirandu sacuã. —Ndequiato rasi que chi aque rĩ nda, i que echoi Jesús mbiirandu ra. ⁴Jirandu mose que Jesús ñee cote ra. —Mano sacuã eã ño erasi chi nguiã aque. Dios quirãcuã ndese mbia mae sacuã ño erasi chi nguiã aque. Se abe sequirãcuã ndese mae sacuã ño erasi chi nguiã aque, i que Jesús ra. ⁵Jesús que nyesequa tuchi Marta rese ra. María rese. Lázaro rese abe no. ⁶Lázaro rasi rese jirandu mose que esi jei eã erea ra. Siquichõ ngue ra. Itõ nyeremo ngue huee ra. ⁷—Nyaobe Judea cote, i que uchimbbaaquiato je cote ra. ⁸Echimbbaaquiato que ñee ee ra. —Namote que judíos ndeiguia serĩte sita je. ¿Mbaerã nda ereso si huee re? i que Jesús je ra. ⁹⁻¹⁰Jesús que ñee ee ra. —Dios quiato que sembu ra. Mbae raã naa sacuã ee. Echeẽ ngue asaã ja eãte ra. Nyebe emo seiquia aroneate namo. Se echeẽ naa ja mose quia ra mbia seiquia arõte cote, i que ñee uchimbbaaquiato je ra. ¹¹Aquere que ñee si uchimbbaaquiato je ra. —Nandequiato que uque cote ra. Lázaro. Taso emumba cote, i que ra. ¹²—Uque mose u, ae ae ra ñumumba rei, i que echimbbaaquiato ee ra. ¹³—Lázaro que mano nda, i eã ngue Jesús ucheẽ mbuchecua tuchi ee ra. Lázaro mano tuchi raque. Lázaro uquechõ nei nguiã echimbbaaquiato je. ¹⁴Jesús que ucheẽ mbuchecua ramo ee cote ra. —Lázaro que mano nda. ¹⁵Coche aico eã nguiã huee. Jẽ nda seicua tuchi cote. Nyao erea cote, i que Jesús uchimbbaaquiato je ra. ¹⁶Tomás que ñee echimbbaaquiato ataque je ra. —Nyao erese nande abe no. Sã mbia nandeiquia nande abe rõ, i que Tomás ra. “Eata”, i que mbia quia Tomás je ra. Eata rei ae.

Jesús mbia raaque mbuquerasa

¹⁷Ngasẽ ngue Betania cote ra. Mbua hue jenda que ñee Jesús je cote ra. —Co Lázaro ati ji chi itõ mocoite co resẽ. Cuatro días tuchite nyeresẽ, i que mbia ñee Jesús je ra. ¹⁸Aichite que Betania Jerusalén si ra. Tres kilómetros que ra. ¹⁹Nyebe judíos rane ngaẽ jate nguiã ngasẽ Jerusalén si. María mbia jiri sacuã. Marta abe no. Enongue raaque ati ji mose. ²⁰Marta jirandu mose Jesús rese que esi erobeishĩ nda. Oo que erese ra. María quiato que siquichõ tuchúaa ra. ²¹Marta que ñee Jesús je ra. —Sererecua, ndeico mose a, eĩ nda senongue manoãte rei. ²²Dios ra ndecheẽ ñandu. “Mbae mo embu seje”, i mose, i que Marta Jesús je ra. ²³—Ndenongue ra quera si, i que Jesús ee ra. ²⁴Marta que ñee ee cote ra. —Ae bei. Mbua raaque quera ja mose, aque mose ra senongue abe quera si. Mbae ua ja mose ra quera si. Aicuate raque se quia co, i que Marta ra. ²⁵Jesús que ñee ee ra. —Mbua raaque mbuquerasa rei se. Mbua mingosa rei se. Ae seicua quia nae, ùquĩ nda mano ndaque, quera si rae. ²⁶Ae seicua quia nae, ùquĩ nda uayã mbei. ¿Ùquĩ ereicua quia co re? i que Jesús ee ra. ²⁷Marta que ñee ee ra. —Ae. Cristo chõ nde re. Dios rucucha chõ nde re. “Dios rucucha ra tu íbii”, i que mbua quia nyii nae, ae chõ nde re, i que Marta Jesús je ra.

Jesús nyeseo

²⁸Aquere que Marta si María mbiirandu ra. —Nandembaaquiatusa que tu ra. Hue que eriqui nderequia ra, i que Marta ñee ngõngue ísa ra. ²⁹Echeẽ nduibe tuchi que María si juã asi Jesús rea ra. ³⁰Jesús ngasẽ mose rocoĩ mbia chuchua ite re. Marta erobeishisa bei que Jesús riqui ra. ³¹Mariaso rese que judíos chi mae ja ra. —Ngõngue atisa chõ María si nguiã nyeseo qui, i rei ngue judíos choi nguiã erui. ³²María que ngasẽ Jesús je ra. Ngoi que ngũã ndese ejii ra. Ñee ngue ee ra. —Ndeico mose a senongue ndasi mose, eĩ nda manoãte rei, i que María Jesús je ra. ³³María que nyeseo ra. Judíos que chi erese, ùquĩ abe que nyeseo no nda. Nyebe que Jesús abe ia eãte ra. Echiã ngue ngoi eã tuchi ra. ³⁴—¿Mangue jenyati mangue re? i que Jesús mbia je ra. —Nyao erea ae, i que mbia ee ra. ³⁵Jesús que nyeseo ra. ³⁶Judíos que ñee nyue ra. —iSã jẽ! Nyesequa tuchi Lázaro rese. Eya eãte riqui erese co, i que mbia ra. ³⁷Emo emo ngue ñee nda. —Jesús que eresayã ndesa mbucherõ. Eĩ nda Lázaro rasi mbucherõ nde chaẽ. Eĩ nda manoãte, i que mbia ra.

Jesús Lázaro mbuquera si

³⁸Jesús ia eãte que ngasẽ Lázaro atiguia ra. Sita imi ye. Sita chõ ngue eatiquia no nda. ³⁹—iSita eatiquia jẽja jẽ! i que Jesús mbia je ra. Marta que ñee Jesús cheẽ mose ra. —iEnete ra nande je jẽ! Curite que mano ndesẽ. Cuatro dñas tuchi que ra, i que Jesús je ra. ⁴⁰Jesús que ñee ee ra. —“Seicua tuchi mose ra eremae Dios quirãcuã ndese”, ae rei que ndeje nyii, i que Jesús ra. ⁴¹Sita eatiquia que mbia jea cote ra. Jesús que mae ibate qiti ra. Ñee Dios je. —Paba, secheẽ ngue erechandu. “Íaanye”, ae bei quia ndeje co. ⁴²Nde quiarei seandu bei. Mbia resa rae aico ñee ndeje a. “Dios chimondo chõ eriqui re”, i nda ã seriĩ ña, i que Jesús ñee Dios je ra. ⁴³Jesús que ñeemombo Lázaro raaque je cote ra. —Lázaro, iechu usẽ! i que ra. ⁴⁴Eraaque que usẽ u juã cote ra. Eo cuasa resebe que usẽ nda. Ei abe ecua ji tiru je. Eruba abe ecua ji tiru je. —Jenyura mondo, i que Jesús mbia je ra.

Jesús nandeiquia, i judíos

⁴⁵Judíos que nyoĩ María rese, ùquĩ ngue mae ja Jesús rese ra. Lázaro mbuquera mose. Ñquĩ tubiriã ngue Jesús icua cote ra. ⁴⁶—Jesús que Lázaro raaque mbuchuruã nda, i que emo nyoĩ fariseos mbiirandu ra. ⁴⁷Fariseos que ñmunua ja cote ra. Sacerdotes rerecua ja rese. Mbia rerecua ja. Ñee tuchi Jesús riĩ. —¿Mañi nande ra equia ee re? Mbia mae sayã naa naa tuchichĩ equia aque. ⁴⁸Nande ereachõ mose ra mbia siqui ja techĩ erui re. iRoma jenda ra nandembae isichĩ ibi jẽ! iDios chuchua ra embucoichĩ ngaẽ jẽ! i que ererecua ñee nyue ra. ⁴⁹Caifás que sacerdote

rerecua tuchi aque mose ra. Ae que ñee uataque je ra. —Mbae jëicuayã tuchichĩ nguia ã. ⁵⁰Jendua eã ñochĩ equia ã. Aque mii ño nda mano nguia nande ja je chã. Eĩ nda judíos ua tuchi eã, i que Caifás uataque je ra. ⁵¹Caifás ae que ñee eã nda. Dios ae quiatu ngue embucheẽ nguia ùquĩ. Sacerdote rerecua tuchite quiatu ngue ae re. Nyebe Dios embucheẽ nguia. —Jesús ra mano judíos mingo ja sacua. ⁵²A jenda achõ je eã nda Jesús mano. Dios riirĩ mangue choñoa jenda je abe chõ nda Jesús mano nguia. Dios riirĩ munua ja sacua, i que Caifás ñee nda. ⁵³Aque mose bei que judíos rerecua ñee ñee nyue ra. —iJesús nandequia rei jë! i que equia ñee ñee nyue ra. ⁵⁴Jesús que nyecua eã judíos je cote ra. Judea si que esi cote ra. Turuquia rurubi que esi ra. Efraín, i que sucha tubiriã je ra. Huee que eriqui arete uchimbaaquiato rese cote ra. ⁵⁵Fiesta de la pascua que ecurubite ra. Nyebe judíos nyoĩ choi ja nguia Jerusalén. Suchamo jenda emo emo ngue nyoĩ jate ra. Pascua nonde que echoi huiicua mbitirõ sacua nda. ⁵⁶Mbia que Jesús sequia quia ra. —¿Tu ra fiesta re? ¿Tu eã nda re? ¿Tu aroneate jëje re? i que mbia ñee ñee nyue Jesús riĩ nda. I que mbia u ñee Dios chuchúaa ra. ⁵⁷Mbia rerecua que ñee mbia je nyii ra. —Emo jirandu mose Jesús rese, sã urembiirandu jei. Eĩ nda ureisi. Eĩ nda uretarõ miĩ, i que sacerdote rerecua ñee nyii ra. Fariseos abe no.

María aba mbushimbusa ichusẽ Jesús i rese

12 ¹—Seis días mose ra pascua cote, i que mbia ra. Aque mose que Jesús si Betania nda. Huee que Lázaro riqui ra. Ae Jesús mbuquera erua si. ²Mbia que ñio mii Jesús chiurã nda. Marta que echiurã mondo mondo ee ra. Mbia je abe. Lázaro abe que chĩ quiaru erese ra. ³María que aba mbushimbusa queru Jesús je cote ra. Medio litro. Nardo, i que ùquĩ je ra. Mbae isiquia mumba tuchi que ùquĩ nda. María que eichusẽ Jesús i rese ra. Ua je que esi esi ra. Tuchua mbushimbu ja que ra. ⁴Judas Iscariote abe que siqui ra. Simón ndiirĩ ngue aque ra. Jesús chimbaaquiato mo ndei que aque ra. Ae quiatu que Jesús mee mbia icua je emo mose cote ra. Ae que ñee nda. ⁵—¿Mbaerã eichusẽ ñooño nde? ¿Mbae isiquia ribishorõ ño nda aba emondo re? Tres cientos ribishorõ. Mbaecha reã je emee sacua, ùquĩ mbae isiquia, i que Judas ra. ⁶Judas ndua eã ndaque mbaecha reã ndese. Mbae mbuquiachãsa tuchi que ae ra. Mbae isiquia riru que equereco quia Jesús je ra. Eyenda que esirõ sirõ nguia mbuchemi chemi nda. ⁷Jesús que ñee Judas je ra. —iErechechĩ nda María je jë! iSã ae ae riqui jë! Seati nonde chõ aba mbushimbusa icherẽ nguia serese. ⁸Mbaecha reã nguia nda chi are jiri nguia a. Se quia nda aico bei eã nguia jëje a, i que Jesús ra.

Lázaro nandequia, i rei judíos rerecua

⁹Judíos que jirandu jate Jesús rese ra. Eriqui mose Betania. Nyoĩ jate que erea ra. Lázaro abe rea. Ae Jesús mbuquera erua si. ¹⁰Nyebe

judíos rerecua ñimbiirandu nguĩã. —iLázaro abe nandeiquia rei jê! i que ererecua ñee nyue ra. ¹¹Judíos que siqui tuchite Jesús rese cote ra. Nguerecua que esecha jate cote ra. Lázaro que embuquera erua si nyii. Ûquĩ mbei bei que nyii ra. Jesús oso Jerusalén

¹²Mbia tubiriã ngue nyoĩ Jerusalén nda. Pascua raã naã sacua huee. Jesús abe que oso ra. Mbia que jirandu erese ra. Ecuasẽ nonde. ¹³Mbia yate que Jesús cuasẽ mose ra. Sindo que ecuruchoĩ erobeishĩ nda. Mbia que tasẽ tasẽ tuchi ra. —Etura tuchi ruchĩ nguia co. Dios rucucha ruchĩ nguia co. Israel rerecua ruchĩ nguia co cote, i que mbia tasẽ tasẽ tuchi ee ra. ¹⁴Jesús que ngasẽ burro riirĩ mo je ra. Nyui que eato ra. Embesa ji rui si. ¹⁵I que embesa ji quia nyii ra:

iJẽireĩ ireĩchĩ nda, Sion jenda!

Co jenderecua ru quia co.

Co eru quia burro átoo co,

i que embesa ji quia nyii ra. ¹⁶Jesús chimbaaquiatu que ã icuayãte nyii ra. Embesa ji. Jesús quera si mose que ã icua cote ra. —Embesa ji rui si chõ eriqui rei reaẽ, i que echimbaaquiatu eicua ramo cote ra. ¹⁷Jesús que Lázaro mbuquera, ùquĩ ndese maesa que mbia mbiirandu randu tuchi quia ra. ¹⁸Nyebe mbia nyoĩ ja tuchi nguĩã Jesús robeishĩ. Jirandure Lázaro raaque mbuquera rese. ¹⁹Fariseos que ñee ñee si nyue no nda. — Jesús rui ja tuchichĩ mbia. ¿Mañi nda aba mbia je re? i que ñee nyue ra.

Griegos mo Jesús requia

²⁰Griegos mo abe que nyoĩ Jerusalén nda. Pascua raã naa Dios je. ²¹Ûquĩ ngue nyoĩ ñee Felipe je ra. Felipe que Betsaida jenda ra. Galilea jenda. —Uremaese rete Jesús rese, i que griegos Felipe je ra. ²²Felipe que oso Andrés mbiirandu ra. Ûquĩ ja que nyoĩ Jesús mbiirandu cote ra. ²³Jesús que ñee ee ra. —Mbiarã ngue achu ibate si ra. Semano nonde arubite cote. Sequera si nonde arubite cote. ²⁴Tacheẽ nyecua jẽje. Ibasĩ eĩ tiquia eã mose ra ia eã mbei. Chi chooño mbei rae. Etiquia mose ra suri cote. I a tuchi ra cote. Eĩ ae ra se. Ibasĩ eĩ na si. Amano nda se. Mbia ra setiquia. ²⁵Ae nduate quia nyiese nae, ùquĩ nda nyoĩ eãte ibate. Ae ndua eãte quia nyiese nae, ùquĩ nguia ra nyoĩ ibate. Siqui bei sacua huee. ²⁶Ae secheẽ mumba sereãte quia nae, sã ùquĩ ndiqui bei serui. Ae ra aico nae, huee ra ùquĩ abe riqui. Ae secheẽ mumba sereãte quia nae, ùquĩ nii nda Paba ñee turã.

Amano nda se, i Jesús mbia je

²⁷Seya eãte aico co. ¿Mañi ae ra ñee Paba je re? “Semingobe rei se ae. Sembasiã ndei se ae”, ae aroneate Paba je. Æ sacua ño ngue achu resẽ. Sembasi sacua ño ngue achu resẽ. ²⁸Paba, ndequirãcuã eteacuquia mbia je, i que Jesús ra. Ûquĩ mose que echeẽ mo ndu ee ibate si ra. —Sequirãcuã

ngue ateaquía mbia je ra. Ateaquía si ra mbia je, i que ibatenda ñee ee ra. ²⁹Mbia que ibatenda cheẽ ñandu ja rei ra. Ae chi Jesús rese, ùquĩ. —Ama ndieu ereae, i que mbia ra. —Tei. Angel mo ño ngue ñee nguiã Jesús je, i que emo no nda. ³⁰Jesús que ñee mbia je cote ra. —Seje eã ño ngue ibatenda ñee ndesẽ. Jẽ eandu sacua ño ngue ñee ndesẽ. ³¹Paba ra seicuaa reã mbasi ja cote. Mbia icuã nderecua ra Paba mombo ibi jenda cote. ³²Sembucha mose mii ibate, mbia ra siqui tuchi serese cote. Sucha mo jenda ja abete ra siqui serese cote, i que Jesús ra. ³³—Mbia ra seiquia mii sembucha ira rese, i ñene. ³⁴Mbia que ñee Jesús je cote ra. —“Cristo ra siqui beĩ”, i que Dios cheẽ embesa ji urembiirandu. ¿Mbaerã erecheẽ nde? “Mbia ra sembucha ira rese”, i re. ¿Aba quia Cristo re? ¿Aba quia tu mbiarã nde? i que mbia ñee Jesús je ra. ³⁵Jesús que ñee ee ra. —Taico mbirimbe jendese jembaaquiatu quiatu. Jendesaebe mbirĩ. Tata rendi rãte aico co. Tata rendi siqui mose jendese, ijengata turã ño nguia jẽ! Seicuaa reã ño siqui nguiã itondaru. Ùquĩ quiachã ño nguiã ùquĩ. ³⁶Tata rendi raãte aico co. Seico beebe mose jendese, seicua tuchi rã. Eĩ nda jẽingo turã jendesae ji, i que Jesús mbia je ra. Aquere que esi ñemi mbia si cote ra.

Judíos Jesús icua eã mbei

³⁷Jesús que mbia mae sayã saã saã tuchite rei mbia je ra. Mbia que Jesús icuayã mbei chõ nda. ³⁸Ae Isaías mbesa mii nyii nae, ùquĩ na si chõ ngue mbia Jesús icuayã cote ra. Eĩ ngue Isaías embesa mii nda:

Sererecua, ae uresenei senei nguia mbia je nae, ùquĩ mbia icua sereãte quia ã.

Ndequirãcuã mbia tea sereãte quia ã,
i que Isaías embesa ra. ³⁹Mbia que Jesús icua aroneate ra. Isaías chimbese rã si chõ ngue ra. Eĩ ngue Isaías embesa mii no nda:

⁴⁰Dios que mbia chiã matã nda.

Nyebe eriqui mbae icuayãte ã.

Nyebe eriqui nguiã uba eãte serese.

Se embitirõ sacua,

i que Isaías chimbese huĩ nda. ⁴¹Isaías que Cristo quirãcuã tea nyii ra. Nyebe ã mbesa mii nguiã Jesús riĩ a. ⁴²Judíos tubiriãte que Jesús icua ra. Judíos rerecua emo emo abe que Jesús icua rei ra. Siqui checuayã ño ngue Jesús rui ra. Esiquichete quiatu ngue fariseos si re. —iFariseos ra nandemombochĩ mbia chumunuasa si jẽ! i que ra. ⁴³—Dios cheẽ nandemumbayã jẽ, iã ñochĩ ngue re. —iMbia cheẽ nguiatu nandemumbayã jẽ! i chõchĩ ngue re.

Secheẽ nguia ra seucuayãsa mbasi, i Jesús

⁴⁴Jesús que ñee irãtã mbia je ra. —Ae seicua quia nae, se mii icua eã. Paba abe icua. Ae sembu ibate si. ⁴⁵Ae mae nguia serese co nae, Paba abe

rese mae. ⁴⁶Mbia resae sacua ño achu nguiã co. Eĩ nda seicuada siquã itondáruu. ⁴⁷Jëingo secheẽ andu ã. Jemo secheẽ mumba mose, se ra ambasiã. Secheẽ ae ra embasi. Mbia mingo bei sacua ño achu nguiã co. Mbia mbasi sacua eã ño achu nguiã. ⁴⁸Secheẽ nguia ra seucuyãsa mbasi, mbae ua mose. Ibi ua mose. Secheẽ ae ra secheẽ mumbasa mondo tata cuasu. Secheẽ andu chooño nguiatu ngue re. ⁴⁹Se ae eã ño acheẽ nguiã mbia je. Paba quia ñee nguiã seje. “Eĩ ere mbia mbaaquiato quiatu”, i que Paba sembu ra. ⁵⁰Paba cheẽ ndei mbia mingo beisa. Echeẽ mumbayã mose. Nyebe aico nguiã Paba cheẽ nenei nenei co. Secheẽ ae eã ño ñene.

Jesús mbia i irei irei

13 ¹—Namo jiri ra Paba sererao ibate ibi si cote, i que Jesús uchiangui re ra. Nyesecua tuchi que equia uchimbaaquiato rese ra. Mano nyee. ²Jesús que quiaru u uchimbaaquiato rese isa ra. Pascua nonde. —Jesús emondo mbia icuã je, i que diablo Judas Iscariote je nyii ra. Simón ndiirĩ ndei aque. ³Jesús que mbae icua jate ra. —Dios si chõ achu nguiã co. Asobe ra erea. Paba que uquirãcuã mee tuchi seje ra, i que Jesús uchiangui re ra. ⁴Quiaru jare que Jesús juã huiirao mbui ra. Ngũmbi que echucua toalla je ra. ⁵I que eichusẽ mbae mo ye ra. Uchimbaaquiato i que eirei irei ra. Mbiiru iru que toalla je ra. ⁶Pedro i nda eirei nguiã cote chã. —Sererecua chõ nde resẽ. ¿Mañi ere ra sei irei re? i que Simón Pedro ñee Jesús je ra. ⁷Jesús que ñee ee ra. —Á ereicuayãte. Ae asaã saã nguia ã. Ereicua rei ra cote, i que Jesús ñee Pedro je ra. ⁸—Sei ra ereirei eã mbei, i rei que Pedro Jesús je ra. —Ndeirei eã mose, serese eã nda nde cote, i que Jesús Pedro je ra. ⁹—Sei achõ eã eirei rō. Seo abe eirei no. Seãquĩ abe no, i chee que Pedro ee cote ra. ¹⁰Jesús que ñee ee ra. —Ae echasu quiite, equishĩte ũquĩ ndesẽ. Jëi mi ño tairei. Jëquishĩ ja eãte raque. Aque miĩte raque echiã nondei, i que Jesús uchimbaaquiato je ra. ¹¹Jesús que jirandu Judas rese ra. Nyebe eriqui nguiã ñee. —Aque miĩte raque echiã nondei, i.

¹²Ei irei jare que huiirao mingue cote ra. Ngoi si que ra. Ae ñee nguiã nguesenda je. —Jëi que airei, ¿ũquĩ jëicuate rei quia re? ¹³Nyebe jëingo nguiã ñee seje. “Sererecua, Sembaaquiatusa”, i seje. Coche jeñee nguiã seje. Ererecua rei se. ¹⁴Jëi que airei irei. Ererecua raque se. Nyebe jë abe jemo i jëirei irei ae. ¹⁵Nyebe que ateacuquia jëje resẽ. Serui sichõ jëingo emo i irei irei ae. ¹⁶Tacheẽ nyecua jëje. Se rei jenderecua. Se chõ aemondo mondo nguiã mbia mbaaquiato sacua. Jengasu ra jësaã saãchĩ sesi jë. ¹⁷Jë secheẽ icua mose, secheẽ mumbayã mose, jëya tuchi ra jëingo. ¹⁸Jë ja je eã aico nguiã ñee a. Jaëirabo que se resẽ. Jaëicuate que se resẽ. “Ae quiaru serese nae, aque icuãte ra seje cote”, sã embesa ji i no. Embesa ji rui si ra jemo icuã seje cote. Quiarure serese. ¹⁹iA aico ñee jei jëje a jë! Eicuã nonde seje. Eicuã mose seje, jë nda seicua cote. “Dios nducucha” jenyte tuchi ra seje cote.

20 Tacheẽ nyecua jêje. Ae secheẽ nenei neneisa isi quia nae, ùquĩ nda seisi se abe. Ae seisi quia nae, Paba abe isi rae, i que Jesús uchimbaaquiату je ra.

Jemo nda semondo mbia icuã je, i Jesús

21 Jesús ia eã tuchi que cote ra. —Tacheẽ nyecua jêje. Jemo nda semondo mbia icuã je cote, i que ñee nyecua uchimbaaquiату je ra. 22 Echimbaaquiату que mae mae ja chõ nyiese ra. —¿Aba ra re? ¿Aba ra re? i jaaja nyue. 23 Jesús chesecua tuchi que chĩ ngoi ejii ra. 24 Aque je que Simón Pedro o mee mee nda. —“¿Aba ra re?” ere ee, i que Pedro ra. 25 Jesús chesecua que ñimbucha i i ñee Jesús je ra. —¿Aba ra re? i ee. 26 Jesús que ñee ee ra. —Mbichae monde ji ra amee jemo je. Ae je ra amee, aque ra semee mbia icuã je, i que Jesús ra. Mbichae que emonde mondo Judas Iscariote je cote ra. 27 Judas mbichae u mose que Satanás ndu embiicua tuchi cote ra. Jesús que ñee ee ra. —Ae ra eresaã nae, iũquĩ esaã jeichõ jê! i que Jesús Judas je ra. 28 —¿Mbae riĩ Jesús riqui ñee Judas je re? i que eataque ra. Mbia iranuã ja que ra. 29 Judas que mbae isiquia quereco ja quia ra. —Mbae mo eisi rã nandechiurã, i reĩ Jesús quia Judas je uchimbaaquiату je. —Mbae mo emondo rã mbaecha reã je, i reĩ Jesús quia Judas je uchimbaaquiату mo je. Echeẽ ngue eicuayã ja ra. 30 Mbichae ure que Judas si usẽ cote ra. Itondarui rĩ.

Jesús ucheẽ yasu renei mbia je

31 Judas usẽ mose que Jesús ñee nda. —Mbiarã ngue achu ra. Sequirãcuã ndese ra mbia mae cote. Dios quirãcuã abe areco co. Dios quirãcuã abe rese ra mbia mae cote. 32 Aico Dios quirãcuã ndeacuquia mbia je a cote. Dios abe ra sequirãcuã teacuquia mbia je cote. Sequirãcuã nda eteacuquia jei mbia je cote. 33 Seresenda, aico mbirĩ ño nguiã jendese a cote. Serequia rei ra se cote. Acheẽ ngue judíos je, ùquĩ sí aico ñee jêje a. Ae ra aso nae, huee jengasẽ aroneãte. 34 Aico secheẽ yasu nenei jêje a. Secheẽ mumbayã sacuã. ¡Jenyesequa ja jenyiese jê! Sã ñi aico nyesequa tuchi jendese no. ¡Eĩ jenyesequa tuchi jenyiese jê! 35 Jenyesequa tuchi mose jenyiese, mbia ra ñee ja tuchi jeniĩ. “Eĩ nguia Jesús chimbaaquiату quia re”, i ra mbia jêje, i que Jesús uchimbaaquiату je ra.

Pedro ra ñee ñoño seriĩ, i Jesús

36 —¿Manguiti ra ereso re? i que Simón Pedro ñee Jesús je ra. —Ae ra aso nae, huee ereso aroneate namo. Emo mose jiri ra ereso serui cote, i que Jesús Pedro je ra. 37 Pedro que ñeembe ee ra. —¿Mbaerã nda asoã nderese namo nde? Seso sete nderese. Semano sete nderese, i que Pedro Jesús je ra. 38 Jesús que ñee ee ra. —“Semano sete nderese”, erechĩ nguiã seje. Co isa ra erecheẽ ñoño seriĩ tres veces. “Jesús aicuayãte resẽ”, ere chooño nda seriĩ nguira cheẽ nonde, i que Jesús Pedro je ra.

Jesús rei ñeenda Dios icha

14 ¹Jesús que ñee uchimbaaquiatsu je ra. —Jëya eã eriquichĩ nguiã. Dios jëicua chõ ae. Se abe jëicua chõ ae. ²Ae Paba riqui, huee tuchua tubiriãte. Ûquĩ eande rae, eĩ nda acheẽ eãte rei jêje. Aso ra tucharã naã jêje. ³Jenyuchuarã naa jare ra achube jendea cote, jenderao bei serese cote. Jë nda jëingo bei serese pee cote, ae ra aico. ⁴Ae ra aso, huee jëicuate resẽ. Ñeenda abe jëicuate resẽ, i que Jesús ee ra. ⁵Tomás que ñee ee ra. —Ureicuayãte nyeresẽ. ¿Mangue ra ereso mangue re? Ñeenda ra ureicua eãte chi nde, i que Tomás Jesús je ra. ⁶Jesús que ñee ee ra. —Ñeenda rei se. Ñee ñoñoã je rei se. Mbia mingo beisa rei se. Ae ra seicuayãte, ùquĩ nda ngaseã mbei Paba je. ⁷Jë seicua mose, Paba abe jëicuate quia ã. Jë Paba jëicuate quia cote resẽ. Jemae ngue erese namo ndesẽ, i que Jesús ee ra.

⁸Felipe que ñee ee cote ra. —Nderu eteacuquia rã ure je. Ûquĩ mii ño ureico nguiã ñee ndeje, i que Felipe ra. ⁹Jesús que ñee Felipe je ra. —Aico tuchite que jendese, Felipe. ¿Mbaerã ereico seicuayãte re? Ae mae nguia serese, Paba abe rese maete. ¿Mbaerã ereico ñee seje re? “Nderu eteacuquia ure je”, i seje. ¹⁰Co aico Paba rese co resẽ. Paba abe riqui serese co. ¿Ûquĩ ereicuayãte re? Ae aico ñee jêje nae, secheẽ ae eã ño ùquĩ nde. Paba riqui serese co. Ae abe riqui mbae raã naa serese co. ¹¹Secheẽ jëicua rã. Co aico Paba rese co. Paba abe riqui serese co. “Nyia”, jenyje eã mose secheẽ je, sechisaã je chõ “nyia” jenyje.

¹²Tacheẽ nyecua jêje. Ae seicua quia nae, ùquĩ nda sechisaã saã saã se rã si cote. Ûquĩ nda mbae saã saã tuchi sesi. Co quia aso nguiã Paba rea se co. ¹³“Mbae emondo ure je” i mose seje, amondo ra jêje. Jë seicua mose. Eĩ ae ra Paba quirãcuã ndeacuquia mbia je. ¹⁴“Mbae emondo ure je”, i mose seje, amondo ra jêje. Jë seicua mose.

Espíritu Turã tamondo jêje, i Jesús

¹⁵Jenyesequa mose serese, secheẽ jemumbayã ae. ¹⁶Tacheẽ Paba je. “Espíritu Turã emondo sechimbaaquiatsu je”, ae ra Paba je. Espíritu Turã nda siqui bei jendese cote. Jëquiato tuchi ra ae cote. ¹⁷Espíritu Turã nda ñee ñoñoã jêje, jembaaquiatsu quiatsu. Ae ra siqui eã tuchi Dios quiatoã ndese. Espíritu Turã icuayãte quia ñe ne. Jë nguia jëicuate nguiã. Co Espíritu turã ndiqui jendese co. Siqui bei ra jendese.

¹⁸Aso raque quia co. Esi cheecha rã nda jëingoã. Achube ra jembirõ. ¹⁹Aichite aĩ oso a cote. Dios icuasa reã nda mae eã serese cote. Jë nguia nda jemae nguiã serese. Aquera si ra siqui bei nonde. Jë abe ra jëingo bei seriĩ cote. ²⁰Espíritu Turã tu mose ra jëicuate cote. “Jesús riqui ngu rese co. ã ureico Jesús rese ã. Jesús riqui urerese co”, jenyje ra seriĩ cote. ²¹Ae secheẽ icua quia nae, ae secheẽ mumbayãte quia nae, ùquĩ nguia

nyesecuate nguiã serese. Paba nyesecuate ũquĩ ndese. Se abe acheseccuate ũquĩ ndese. Tachecua ñimbucha ũquĩ ndese, i que Jesús uchimbacquiату je ra. ²²Judas, i que echimbacquiату mo je ra. Judas Iscariote eã ño aque re. Judas mo ño aque re. Judas que ñee Jesús je ra. —¿Mbaerã nda erechecua ure je re? Mbia ja je nyecua rocoĩ, i que Judas ra. ²³Jesús que ñee ee ra. —Ae nyesecuate quia serese, ũquĩ secheẽ mumbayãte quia ã. Paba abe ra nyesecuate ũquĩ ndese. Paba ra siqui ũquĩ ndese. Se abe ra aico ũquĩ ndese. ²⁴Ae nyesecua eãte quia serese, ũquĩ secheẽ mumba mumbate quia ã. Secheẽ ae eã asenei senei nguiã jêje co. Paba cheẽ ño asenei senei nguiã jêje. Ae chõ sembu nguiã.

²⁵Seso nonde aico co renei nenei jêje a. Sereco mosebe jendese. ²⁶Paba ra Espiritu Turã mondo jêje secheẽ ndui si. Jêquiato tuchi ra Espiritu Turã cote. Ae ra jembacquiату tuchi mbae ja riĩ cote. Ae ra jemundua tuchi secheẽ ndese cote. ²⁷Co aso quia co. Jêyayã eã taemingo a. Seicuasa reã na si eã taemingo. ũquĩ nguia eya eãte riqui nguiã. Sã seyate se no. Eĩ tai jembia mingo a. ¡Jêya bei chõ jê! ¡Jêsiquicheã ño jê! ²⁸Aso ra Paba rea cote. Aquere ra achube jembirõ. ũquĩ ndese que jêirandu resẽ. Jenyeseccua mose serese, ei ndei ra jêyate secheẽ ndese. “Taso Paba rea”, i mose. Ae quiarei i tuchi sesi. ²⁹Seso nonde aico ñee tuchi jêje a cote. “Ñee ñooñoã tuchi quia equia re”, jenyete tuchi ra seso mose cote. Huee ra jê seicua tuchi cote. ³⁰A nda aicobe ñee ñee jêje chã. Diablo quia tu nguiã co. Mbia icuã nderecua ru quia co. Ae quiarei equirãcuã neã jiri sesi. ³¹Paba cheẽ ndui si taico. Mbia seiquia arondete raque. “Nyesecua tuchi quia equia ngu rese re”, i ra mbia seje cote. Paba cheẽ mumbayã mose. Jêhuã. Nyao, i que Jesús uchimbacquiату je ra.

Jesús rei ira i rã

15 ¹Jesús que ñeembe uchimbacquiату je ra. —Se rei ira i rã. ²Paba rei ira raarõsa rã. Ira rãquiã ndibisho ia eã mose, nyisia rae. Erãquiã ia mose, saarõ turã ndae. Mbeerera rera rae. Embitirõ sacuã. Ia tuchi sacuã cote. ³Jê ngue secheẽ jêisi turã ndesẽ. Nyebe Paba jembitirõ secheẽ je resẽ. ⁴Jêingo bei ñimbucha serese. Sã aico ñimbucha jendese no. Ira rãquiã ae ra ia eã. Siquiã mose ñimbucha hui rese. Eĩ jenyete ra jê. Mbae turã nda jêsaã eã jê ae. Siquiã mose ñimbucha serese. ⁵Se rei ira i rã. Erãquiã na ndei jê. Jêingo mose ñimbucha serese, seico mose ñimbucha jendese, jêturã tuchi ra jêingo cote. Jê ae ra mbae turã jêsaã eã, siquiã mose ñimbucha serese. ⁶Ae siquiã ñimbucha serese nae, ũquĩ nda siqui ira rãquiã sia ji rã. Eĩru mose ra mbia emunua nua. Eréi sacuã. ⁷Jêingo bei mose serese, jeñee nda amumbayã. “Mbae embu ure je”, i mose, amondo ra jêje. Jêtesareia mose secheẽ si. ⁸Jêingo turã mbei mose, mbia ra ñee turã turã mbei Paba riĩ. Jêingo turã mbei mose, “Jesús chimbacquiату tuchi quia eriqui re”, i ra mbia jeniĩ. ⁹Sã Paba

riqui nyesequa serese nae, eĩ ae si equia nyesequa jendese co. Jẽingo bei ñimbucha serese. Eĩ nda achesecua bei jendese. ¹⁰Paba cheẽ amumbayãte quia co. Nyebe Paba riqui nguiã nyesequate serese co. Jẽ secheẽ mumbayã mose, achesecua bei tuchi ra jendese. ¹¹Aico ñee jembaaquiato co. Jembia sacuã. Sã seyate se no, se rã si ra jẽya.

¹²Ã ndei secheẽ ã: ¡Jenyesequa tuchi quia jenyiese jẽ! Sã aico nyesequa tuchi jendese no. ¹³“Se tamano sequiato ribishorõ”, i mose emo, aque quiarei nyesequa tuchite uquiato rese. ¹⁴Sequiato rei jẽ, secheẽ mumbayã mose. ¹⁵“Serimba” aeã nda jẽje cote. Ererequa quiato “sequiato” i ãte nguiã ngũimba je. Ñee ja eãte ngũimba je. Sã eriqui ñee ja uquiato je no. Se quia ñi Paba cheẽ asenei senei jate nguiã jẽje. Nyebe “sequiato” tae jẽje cote. “Serimba” i rocoĩ. ¹⁶Jẽ ngue seirabo eã ndesẽ. Se quiato ngue jaẽirabo nguiã. ¡Mbae turã ño jesaã saã mbei quia seje jẽ! ¡Jenyisaã nda uachĩ jẽ! Jẽ ngue seicuate. Nyebe jẽ “mbae mo embu ure je”, i mose Paba je, mondo ra jẽje. ¹⁷Ã ndei secheẽ jẽje ã: ¡Jenyesequa tuchi quia jenyiese jẽ!

Mbia ataque Jesús rimba ucuayã

¹⁸Dios icuasa reã nda jẽucuayãte cote. ¡Jẽicua quiato jẽ! “Eĩ ngue equia Jesús ucuayã nyii resẽ”, jentye ra cote. ¹⁹Jaẽirabo que se ra. Nyebe jẽingo nguiã Dios icuasa reã na eã. Nyebe eriqui nguiã jẽucuayãte ã. Jẽ ùquĩ na mose, eĩ nda eriqui turãte rei jendese. ²⁰Acheẽ ngue jẽje nyii, iũquĩ ndese jendua jẽ! ¡Jengasu ra jesaã saãchĩ sesi jẽ! Mbia icuã mose seje, jẽje abe ra eicuã. Mbia secheẽ mumbayã mose, jẽ abe cheẽ mumbayã ndae. ²¹Serĩ nda Dios icuasa reã jẽ jẽ jẽje. Dios icuayãte quiato nguiã ã. Nyebe ra eicuã icuãte jẽje. ²²Achu que mbia mbaaquiato quiato ra. Nyebe ra Dios eicuã tea chooñoã cote. Eĩ nda Dios eicuã tea chooño ndei. Se embaaquiato eã mose. “Ureicuã ureicuayãte quia ã”, i aronea ño emo cote re. ²³Ae seucuayãte quia, Paba abe ucuayãte equia ã. ²⁴Mbia mae sayã ngue ateacuquia tuchi rei ee ra. Sechisaã nda mbia mo saã eã. Eĩ nda Dios mbia icuã tea chooño ndei. Sechisaã ndese mae eã mose. Sechisaã ndese mae ndaque, seucuayã ño nguiã ã. Paba abe ucuayã ño nguiã ã. ²⁵Mbia riqui seucuayãte ã. Sã embesa ji riqui ñee no: “Mbia seucuayãte. Se mbae icuã asaã eãte raque”, sã embesa ji riqui i no. Ûquĩ iquechĩ cote. ²⁶Seso mose Paba rea, Espiritu Turã tamondo jẽje. Jẽquiatorã. Ae ra tu Paba si jẽje. Ae ra ñee ñooñoã jẽje. Ae ra jembaaquiato quiato turã seriĩ. ²⁷Nyii mosenda bei chõ jẽingo nguiã serese. Nyebe ra jẽ abe mbia jembaaquiato quiato turã seriĩ, i que Jesús ra.

16 ¹Jesús que ñee i i uchĩmbaaquiato je ra. —A aico ñee jẽje a. Eĩ nda jẽhui eã sesi, mbia icuã icuã mose jẽje. ²Mbia ra jendiquisã quisã, jẽso jẽso mose mbia chumunuasa. “Á ureico rei nguiã mbae turã naa naa Dios je ã”, i ra mbia jẽiquia iquia mose. ³Seicuayãte quia ñe ne.

Paba abe icuayãte quiatu nguiã ã. Nyebe ra eriqui mbae raã icuã icuã jêje. ⁴Eĩ ae chõ nguiã ñee jêje co. Eĩ nda jendua secheẽ ndese, mbia icuã icuã mose jêje. “Jesús cheẽ iquechĩ cote”, jenye ra cote.

Espíritu Turã nda jembaaquiato quiatu, i Jesús

Acheẽ jei eã ngue jêje ùquĩ cose resẽ. Aicote quiatu ngue jendese re. ⁵Co quia asote nguiã Paba rea co cote. Ae sembu. “¿Manguete ra ereso manguete re?” i eã ñochĩ jemo seje. ⁶Se “taso” i mose jêje, jêya eãte chõ jêingochĩ nguiã ã. ⁷Tacheẽ nyecua jêje. Coche aso nguiã jendecha co. Espiritu Turã nda ambu jêje. Jêquiatorã. Ae ra siqui jendese. Eĩ nda Espiritu Turã tuãte rei. Seso eã mose jêsi. ⁸Espiritu Turã tu mose ra ñee ñee mbia je. “Mbia icuã ja chõ ñe ne. Jêingo turã Dios resa rae. Dios ra Jesús icuasa reã mbasi ja”, i ra Espiritu Turã ñee mbia mbaaquiato quiatu. ⁹“Jê nguiã Jesús jêicuayãte nguiã ã. Nyebe jêicuã ndiqui nguiã”, i ra Espiritu Turã ñee mbia mbiirandu. ¹⁰Aso ra Paba rea cote. Mbia ra mae eãte serese cote. Nyebe ra Espiritu Turã mbia mundua mbae turã ndese cote. ¹¹“Dios ra diablo mondo tata cuasu. Nyebe ra mbia icuã abe mondo tata cuasu”, i ra Espiritu Turã ñee mbia mbiirandu.

¹²“Taembaaquiato jiri”, ae rei se. Jêicuayã jeite chõ ndae. ¹³Espiritu Turã tu mose, ae ra jembaaquiato quiatu turã mbae ja rese. Ñee ñooñoa tuchi rae. Ucheẽ ae ra esenei seneiã. Paba cheẽ ño esenei senei nguiã. Mbae tu nonde ra Espiritu Turã jembiiirandu erese. ¹⁴Espiritu Turã nda jembaaquiato quiatu secheẽ ñi. Ùquĩ mose ra mbia ñee turã turã seriĩ cote. ¹⁵Ae Paba senei senei nguiã, ùquĩ asenei senei nguiã se abe co. Nyebe ra Espiritu Turã jembaaquiato quiatu secheẽ ñi.

Jêya eande nyii ra jêya tuchi cote, i Jesús

¹⁶Namo jiri ra jemaẽ eã serese cote. Aquere ra jemaembe serese cote. Aso ra Paba rea, i que Jesús uchimbbaaquiato je ra. ¹⁷Echimbbaaquiato que ñee ñee nyue ra. —¿Mbae i Jesús quia re? “Namo jiri ra jemaẽ eã serese cote. Aquere ra jemaembe serese cote. Aso ra Paba rea”, i chõchĩ. ¿Mbae ùquĩ nde? ¹⁸¿Mbaerã eriqui “namo jiri” i re? ¿Mbae riĩ eriqui ñee nde? Nandeiranuã tuchichĩ, i que echimbbaaquiato ñee nyue ra. ¹⁹Jesús que jirandu erese ra. —“Ndecheẽ embiasa jiri ure je” ¿jenye sete seje re? “Namo jiri ra jemaẽ eã serese cote. Aquere ra jemaembe serese cote”, ae que jêje, ¿aque jêicuayãte re? ²⁰Tacheẽ nyecua jêje. Namu jiri ra jenyeseo. Jêya eãte rae. Sequiatoã nda eya tuchi. Aquere ra jêya tuchi cote no. Jêya eande nyii. ²¹“Serasichĩ nda cote re”, i ra esi ndua ndua aquẽ nyaacuquia seriĩ mose. Eyayã tuchi ae. Áquẽ nyaacuquia mose cote, eya tuchi ra cote. Ndua eã tuchi ra ngasi rese cote. Eya tuchi chõ nda nguiĩ ndese cote. ²²Áquẽ ndasi rã ño jẽ nde. Jêya eãte namo. Setube mose jendea, jêya tuchi ra cote. Emo nda jembia eã eã cote. ²³“Ndecheẽ embiasa jiri ure je”,

jenye eã nda seje cote. Tacheẽ nyecua jêje. Jê seicuate. Nyebe jê “mbae mo embu ure je”, i mose Paba je, mondo ra jêje. ²⁴“Mbae mo embu ure je. Jesús icuasa je”, jenye eã mbeite equia Paba je ã. Jeñee ee. Jeñee mose ee, mondo ra jêje. Jêya tuchi ra cote.

Jesús quirácuá tuchi ibi jenda si re

²⁵Acheẽ tuchi rei que jêje ra. Secheẽ ngue ambiasa tuchiã jiri jêje ra. Emo mose jiri quia ra secheẽ ambiasa tuchi jêje cote. Paba riã. ²⁶Aque mose ra jeñee Paba je. “Mbae embu rã ure je”, jenye ra Paba je seriã. Aque mose ra acheẽ eã ee jeniã cote. Jê ae chõ nda jeñee ee cote. ²⁷Paba sí nyesequa tuchite quia jendese co. Jenyesequate quiatu nguiã serese ã. “Dios que Jesús mondo nande je resẽ”, jenye quiatu nguiã seje ã. Nyebe Paba riqui nguiã nyesequa tuchi jendese. ²⁸Paba si que achu íbii resẽ. Asobe ra ibi recha cote. Paba rea ra asobe ibátee cote, i que Jesús ñee uchimbaaquiato je ra.

²⁹Echimbaaquiato que ñee ee ra. —Ereicochĩ ñee nyecuate ure je a cote. Ndecheẽ erembiasa tuchichĩ nguia ure je a cote. ³⁰Mbae ereicua ja tuchi quiato quia nde reaẽ. Mbia ndua ndua ereicuate quia equia co reaẽ. Ñee nonde ndeje. Nyebe ureico nguiã ndeicuate ã. “Paba si chõ erechu nguiã co”, ure equia ndeje ã, i que echimbaaquiato ee ra. ³¹Jesús que ñee ee cote ra. —Jê ngue seicuate rei nguiã. ³²Seandu rã se. Namó jiri ra jeñimbuchao chao oso sesi. Jêso ja ra serecha namó. Se ae eã nda aico. Paba riqui nguiã serese co. ³³Jê seicua mose, mbae ra jembia eã eã. Nyebe aico nguiã jembiiirandu randu beite co. Mbia icuã icuã mbeite ra eriqui jêje a íbii. ¡Jeñimbirácuã jiri quia jê! Se quia sequirácuã tuchi ibi jenda si re, i que Jesús ñee uchimbaaquiato je ra.

Sechimbaaquiato eteaquiato, i Jesús Dios je

17 ¹Jesús ñee jare uchimbaaquiato je que soboiba mae ibate ñee Dios je ra. —Paba, ndecheẽ ndiquichĩ io a cote. Seturã eteaquiato mbia je cote. Eĩ nda se abe ndeturã ateaquiato mbia je. ²Nde chõ ngue semii mbia rerecurã, Paba. Mbia mingo bei sacuã. Mbia que ereme seje, ùquĩ mingo bei sacuã. Se rei nderucucha. ³Paba, nde mii ndei Dios tuchi ereico co. Se rei Jesucristo ndechimbu ibate si. Ae ndeicuate quia nae, se abe icua equia nae, ùquĩ nda siqui bei. ⁴Ndeturã ngue ateaquiato mbia je ra. “Á esaã íbii”, ere que seje, ùquĩ ngue asaã ja cote ra. ⁵Paba, seturã eteaquiato mbia je. Cose ndare rã. Mbae eã mosenda rã. Asobe ra siqui nderese. MSã ndeturã eteaquiato mbia je nae, seturã abe eteaquiato mbia je.

⁶Mbia que ereme seje, ùquĩ ngue ambiiirandu tuchi nderese ra. Nembae rei que nyii ra. Ereme seje cote ra. Ndecheẽ ngue emumbayã nda. ⁷Nde chõ ngue sembaaquiato quiato nguiã, Paba.

Ndecheẽ ae chõ ã nde. Secheẽ eã ño ñe ne. Ûquĩ ngue sechimbaaquiату icuate ra. ⁸Eresenei senei ngue seje, ùquĩ ngue asenei senei ja ee ra. Nandechẽ ngue eisi ja turãte ra. “Paba si que Jesús ru ra. Paba que embura”, i equia nderiĩ ã. ⁹Sechimbaaquiату eteaquiату, Paba. Seicuasa reã je eã ño aico nguiã “eteaquiату” i ndeje. Ae eremeese seje nae, ùquĩ je chõ aico nguiã “eteaquiату” i ndeje. Nderimbate quia ñe ne. ¹⁰Ae nderimba nae, serimba chõ se abe re. Ae serimba nae, nderimba chõ ùquĩ no nde. Serimba riqui ñee turã mbei seriĩ ã. ¹¹Asobe ra ndeje, Paba. A ra aicoã íbii cote. Serimba quia ra chichõ íbii. Eteaquiату, Paba. Ae eremeese seje, ùquĩ eteaquiату ndequirãcuã je. Mbae mii ndese ja chõ emundua ndua mingo. Sã nande nandendua ndua mbae mii ndese no nae. ¹²Ae eremeese seje, ùquĩ ngue ateaquiату quiату quia ndequirãcuã je ra. Seico mose íbii. Emo ngue quiachã eãte sesi ra. Aque mii nda quiachã. Embesa ji cheẽ ndui si ra aque mii quiachã. Huiicua je. Emo ngue quiachãyã cote ra. ¹³Aso ra nderea cote. Seico beebe mose íbii, aico ñee ñee ndeje serimba riĩ a. Í nda eya quiату chí a. Sã seyate se no. ¹⁴Ndecheẽ ngue asenei senei ee ra. Ibi jenda eã ño se re. Serimba abe rei ibi jenda eã. Nyebe ibi jenda riqui nguiã serimba ucuayã. ¹⁵“Serimba erao ibi si”, ae eã ño nguiã ndeje co, Paba. “Eteaquiату diablo si”, ae chõ nguiã ndeje co. ¹⁶Se rã si rei serimba. Ibi jenda eã ndiqui ã. ¹⁷Serimba emingo tuchi icúe nembraerã. Ndecheẽ je emingo icúe. Nde quia erecheẽ ñooño eãte nguiã. ¹⁸Sã nde sembu mbia je no, eĩ ae si chõ nguiã serimba mondo mondo mbia mbaaquiату quiату co. ¹⁹Aico ñimondo tuchi ndeje co, Paba. Mano sacua serimba je. Í nda serimba abe ñimondo tuchi ndeje.

²⁰Ã nii achõ eã aico ñee ndeje. “Eteaquiату” i ndeje. Ã nda secheẽ senei senei emo je abe cote. Ûquĩ abe ra seicua cote. Serimbarã. Ae ra seicua icua nae, ùquĩ abe eteaquiату. ²¹Mbae mii ndese ja chõ ùquĩ emundua ndua mingo. Mbae mii naanguia tuchi emingo nanderese, Paba. Sã ereico serese no nae. Sã aico nderese no nae. Eĩ nyere si ùquĩ mingo mbae mii na. Eĩ nda mbia seicuasa reã ñee seriĩ. “Dios chimbu quia eriqui re”, i nda mbia ñee seriĩ ña. Seicuasa siqui mose mbae mii ndese. ²²Ndeturã ngue eremeese seje, eĩ ae que seturã mondo seicuasa je ra. Eĩ nda eriqui mbae mii na. Sã nandeico mbae mii na nande no, Paba. ²³Nyebe aico nguiã seicuasa rese co. Nde ereico serese co no. Nyebe seicuasa riqui mbae mii na co. Eĩ nda seicuasa reã ñee nderiĩ. “Dios quia Jesús mbu quia reaẽ. Dios quia nyesecua quia Jesús icuasa rese re. Jesús rese rã si nyesecua”, i nda mbia ñee nderiĩ ña. ²⁴Paba, serimbarã ngue eremeese seje. Ae ra aso, sã echoi serea siqui bei huee serese cote. Ndecheẽ turã andu sacua seriĩ huee. Erecheẽ turã mbeite seriĩ. Ibi eã mosenda bei chõ ereico nguiã nyesecua serese co. ²⁵Ndeturã tuchi, Paba. Seicuasa reã ndeicuayãte quia ã. Se quia areicuate nguiã co. Serimba abe que ndeicuate quia ã no nda. “Dios chimbu”, i seje nderiĩ. ²⁶Arerenei nenei tuchi que serimba je

ra. Tarerenei nenei tuchibe ee. Eĩ nda nyesequa tuchi nyiese. Sã ereico nyesequa tuchi serese no nae. Taico bei serimba rese cote, i que Jesús Dios je ra.

Mbia icuã ngaë Jesús ruruchoi

18 ¹Jesús ñeende ngu je que echoi ama ñetē ndobei ra. Cedrón, i que aque ama je ra. Aque robei que esi uchimbaaquiatu rese ra. Iraqui turã mo ngue echoi ra. ²Jesús que oso oso beite quia huee ra. Iraqui re. Uchimbaaquiatu rese. Nyebe Judas riqui nguiã huee icuate. — Jesús tateacuquia checuayã mbia je, i que Judas ra. ³Nyebe Judas mbia ruruchoi nguiã huee Jesús isi sacuã. Soldados que ecuruchoi ra. Policía jenda abe que ecuruchoi no nda. Sacerdotes rerecua chimondo rei policía. Fariseos chimondo abe no. Ũquĩ ja que nyoĩ ngasē Jesús je ra. Tiquise que ecuruchoi quia ra. Lámparas abe no. Mbae rendi abe no. ⁴Jesús que mbae icuate ra. —Mbia ra jeĩ jeĩ seje, i que eicuate ra. —¿Aba rea jenyu quia co re? i que oso ñee ee ra. ⁵—Jesús rea urechu quia co. Nazaret jenda, i que mbia ñee nda. —Se chõ Jesús resē, i que ee ra. Judas abe que siqui mbia rese huee ra. Ae que siqui Jesús mee mbia icuã je huee ra. ⁶—Se chõ Jesús resē, i mose que mbia siri siri choi uquite quiti ra. Ngoĩ ngoĩ chee que echoi ra. ⁷—¿Aba rea jenyu quia co re? ibe que Jesús ñee ee ra. —Jesús rea urechu quia co, i que ra. ⁸Jesús que ñeembe ee ra. —“Se chõ nyeresē”, ae que jėje. Serequia mose, sererao se ae. Sã seresenda chichõ, i que Jesús ee ra. ⁹—Ae Paba mee seje serimbarã, ũquĩ mo quiachâyate sesi, i que Jesús nyii ra. Nyebe ñee nguiã mbia je cote. —Sã seresenda chichõ, i mbia je cote. ¹⁰Simón Pedro que uchuuru siqui tiquise ra. Sacerdote rerecua rimba rese que tiquise rerequie requia ra. Eisa que echisia equiatocuti quitinda ra. Malco, i que aque je ra. Ae isa Pedro chisia. ¹¹Jesús que ñee Pedro je ra. —Ndechuuru emingue chõ eriru ye. Paba cheẽ tamumbayã na. Tachecuachõ na mbia je. Sã mbia icuã sembasi tuchi cote, i que Jesús Pedro je ra.

¹²Soldados que Jesús isi cote ra. Soldados rerecua rese. Policía rese. Ũquĩ ja que Jesús isi ra. Nyucua que suruchoi ra. ¹³Anás chuchua rane ngue eruruchoi ra. Anás ndiirĩ ngue Caifás ninisi ra. Caifás que sacerdote rerecua aque mose ra. ¹⁴Caifás sí quia que ñee nyii ra. —Aque miĩ ño nda mano nguiã nande ja je chã, i que judíos je nyii ra.

Jesús aicuayãte, ichõño Pedro

¹⁵Mbia Jesús ruruchoi mose que Simón Pedro nyoĩ erui ra. Jesús chimbaaquiatu nongue rese. Co miĩ ndese. Enongue que sacerdote rerecua icua ra. Nyebe ique oso nguiã Jesús rui. Sacerdote rerecua itaicuee. ¹⁶Mbia que Pedro siquisã miĩ etaronda robei ra. Sacerdote chiicua que tu nyebi ñee echiquesa raarõsa je cote ra. —Sã Pedro ique

rã serese, i que ra. Nyebe emingue nguiã cote. ¹⁷Echiquesa raarõsa que ñee Pedro je ra. —¿Jesús resenda nde re? i que nyucuaaque Pedro je ra. Echiquesa raarõsa. —Tei, ichõiño ngue Pedro ee ra. ¹⁸Nyiiseite mose que ra. Nyebe policia jenda tata mbucha nguiã. Sacerdote rimba rese. Ûquĩ ja que chi nyee ra. Pedro que chĩ nyee erese ra.

Sacerdote rerecua ñee Jesús je

¹⁹Sacerdote rerecua que ñee Jesús je ra. —¿Aba ndechimbaaquiatu re? ¿Mbae riĩ ereico mbia mbaaquiatu quiatu re? i que ererecua ra. ²⁰Jesús que ñee ee ra. —Se que acheẽ ja mbia resa rae ra. Mbia chumunua nuásaa ja que aico mbia mbaaquiatu quiatu ra. Dios chuchúaa abe no. Acheẽ nyecuayã cuayã eã ngue se quia mbia ísaa ra. ²¹¿Mbaerã ereico ñee seje re? Secheẽ andusa je quia echeẽ. Sã ùquĩ ñee. Mbae riĩ acheẽ ee re. Ûquĩ ngue secheẽ ñandu ja quia ra, i que Jesús ererecua je ra. ²²Jesús cheẽ mose que policia jenda mo ucua eritii rese ra. —¿Mbaerã ereico ñee sacerdote rerecua je ùquĩ nde? i que policia mo ñee ucua Jesús rese ra. ²³Jesús que ñee ee ra. —Secheẽ icuã mose quia echeẽ seje. Mbae icuã ñi aico ñee nde. Secheẽ turã mose chõ erecuachĩ nguiã serese, i que Jesús ee ra. ²⁴Anás que Jesús mondo Caifás je cote ra. Ecuasa que ecuruchoi Caifás je ra. Caifás que sacerdote rerecua ra.

Jesús aicuayãte, i si Pedro

²⁵Pedro que nyee beite u tata ra. Mbia mo ngue ñee ee ra. —¿Jesús resenda nde re? i ee. —Tei, ichõiño ngue Pedro ee ra. ²⁶Ae isa Pedro chisia nae, aque resenda que siqui huee ra. Sacerdote rerecua rimba chõ ae re. Ae que ñee Pedro je ra. —Nde rese amae iraquí re Jesús rese reae, i que Pedro je ra. ²⁷—Tei, ichõiño ngue Pedro ee no nda. Aque mose tuchi que nguira ñee cote ra.

Pilato ñee Jesús je

²⁸Policia jenda que Jesús curuchoi Caifás chuchua si cote ra. Ererecua tuchi chuchúaa que eruruchoi cote ra. Pretorio, i que hue tuchia je ra. I que nyaashĩ u quia cote ra. Judíos que iqueã ererecua chuchua ra. Mbaeiaete que abae chuchua ee ra. Pascua raã nonde. —Eĩ nda oveja roo nandeuãte rei pascua mose, ique mose abae chuchua, i que ra. ²⁹Nyebe Pilato si nguiã usẽ ñee ee. —¿Mbaerã jëingo ñee Jesús je re? ¿Mbae icuã esaã nde? i que Pilato ra. ³⁰Mbia que ñee ee ra. —Jesús que mbae icuã saã saãte ra. Eĩ nda uremondoãte rei ndeje. Mbae icuã naa naa eã mose, i que mbia Pilato je ra. ³¹Pilato que ñee mbia je ra. —Jẽ ae Jesús jendao ae. Jẽ ae jëingo erese ae. Jẽ ae Jesús jembasi mbasi ae. Jenamei ñimbasa mumba mose, i que Pilato ee ra. Judíos que ñee Pilato je ra. —Ure rei judíos. Ure mbia mo ureiquia aroneate. Nde chõ echb ã. “Jëiquia” ere chõ

soldados je, i que mbia ñee Pilato je ra. ³²Jesús cheẽ iquechĩ cote. —Mbia ra seiquia sembucha ira rese, i rei nyii. Echeẽ iquechĩ cote.

³³Pilato que ique si oso uchuchúaa ra. Ae “quiatuchu” i nguiã Jesús je. —¿Judíos rerecua tuchi nde re? i que Pilato Jesús je ra. ³⁴Jesús que ñee ee ra. —¿Nde ae erecheẽ nguia seje a re? Emo ñee ndeje nyii reae, i que Jesús ee ra. ³⁵Pilato que ñee ee ra. —Judío eã ño se resẽ. Judíos sí chõ ngue nemondo seje resẽ. Sacerdote rerecua abe no. ¿Mbae icuã eresaã nde? i que Pilato ra. ³⁶Jesús que ñee ee ra. —Ererecua raque se. Ererecua eã ño se a íbii re. Eĩ nda serimba nyarõ tuchi rei serese, judíos ndiquisã quisã tuchi sesi. Ibi jenda rerecua eã ño se re, i que Jesús Pilato je ra. ³⁷—¿Ererecua rei nde re? i si que Pilato ñee Jesús je ra. Jesús que ñeembe ee ra. —Ae. Achu que íbii ra. Sechusua rei íbii. Achu que mbia mbiirandu randu Dios cheẽ niĩ nda. Ichõĩñosa reã ñee niĩ. Ichõĩñosa reã ndesenda ra seandu ja, i que Jesús Pilato je ra. ³⁸—¿Mbae ichõĩñosa reã nde? i que Pilato ee ra.

Jesús jembucha iquia ira rese, i ererecua

Aquere que Pilato usẽ si oso ñee judíos je ra. —Mbae icuã Jesús saã eãt e reae. ³⁹Pascua mose bei que aico etarõ ji mbusẽ mondo bei jêje ra. ¿Aba ra ambusẽ mondo jêje namo nde? ¿Judíos rerecua ra ambusẽ mondo jêje re? i que Pilato ñee mbia je Jesús riĩ nda. ⁴⁰Mbia que ñee mombo mombo ja Pilato je ra. —Tei. Aque eã. Barrabás quia embusẽ imbu ure je, i ja que mbia ñee nda. Mbae mbuquiachãsa tuchi rei Barrabás.

19 ¹—Jesús jêiruã nua, i que Pilato ra. Mbia que Jesús iruã nua cote ra. ²Nyu ritiméi uma ji que soldados miĩ Jesús áquĩ ndese ra. Tiru ireĩ ngue emingue ee ra. ³—Judíos rerecua tuchi chõ nde re, ichõĩño ngue soldados ucua ucua Jesús rese ra. ⁴Pilato que usẽ si oso ñee mbia je ra. —Secheẽ jeñandu rã. Acheẽ ndei que Jesús je ra. Mbae icuã esaã eãte reae. Nyebe anosembe nguiã jêje co, i que Pilato ra. ⁵Jesús que econosẽ mbia je ra. Nyu ritiméi uma ji que equerao quia uãquĩ ndese ra. Tiru ireĩ ngue equerao quia nguete rese ra. —A Jesús a resẽ, i que Pilato Jesús ndeacuquia mbia je ra. ⁶Sacerdote rerecua que chi ja huee ra. Policía jenda mo abe que chi huee ra. Ũquĩ ja que ñee mombo mombo Pilato je ra. —iEmbucha ira rese! iEmbucha ira rese! i ja que ñee mombo mombo ee ra. Pilato que ñee ee ra. —Jẽ ño jembucha ira rese ae. Mbae icuã esaã eã arõte seje, i que Pilato mbia je ra. ⁷Judíos que ñee Pilato je cote ra. —“Dios rucucha rei se”, ichĩ Jesús nguiã. Nyebe eiquia. Sã embesa ji riqui i no: “Ae Dios ririĩ saã saã nguia, aque jêiquia”, i que embesa ji ra, i que judíos ñee Pilato je ra. ⁸—Dios rucucha, i mose que Pilato siquiche tuchi cote ra. ⁹Pilato que ique si oso ñee Jesús je ra. —¿Ma jenda rei nde re? i que Pilato Jesús je ra. Jesús que ñee eã tuchi echeẽ mose ra. ¹⁰Pilato que ñee si ee ra. —¿Mbaerã ereico ñee ãte secheẽ mose re? Arembucha arõte

ira rese. Arembui abe arõte se. Se chĩ mbia rerecua, i que Pilato ñee Jesús je ra. ¹¹Jesús que ñee Pilato je ra. —Dios nemii eã mose mbia rerecuarã, eĩ nda ereoco ãte rei serese. Ae semondo ndeje, ae quiarei eicuã tuchi ndesi, i que Jesús ee ra.

¹²Aque mose bei que Pilato ndua ndua Jesús rese ra. —Jesús tambui mondo, i raque ndua ndua. Judíos quiatu que ñee ee ra. —Nya. ¡Erembuichĩ nda jẽ! Nde embui mose, César quiato eã nda nde cote. “Ererecua rei se”, i quia ñi Jesús re. Nyebe eicuãte riqui nguiã César je, i que judíos tasẽ tasẽ Pilato je ra. ¹³⁻¹⁴Judíos cheẽ andu mose que Pilato ngoi ngũenda tose ra. Huee que eriqui ñee mbeite mbia je ra. Gábata, i que erenda je ra. “Sita mbiitee ji”, i ñi Gábata re. —Jesús jendu rã seje, i que Pilato policía jenda je cote ra. Pascua nonde. Mbia ico quiatu mose pascua nonde. Tenda nandeite re mose. —A jenderecua ñi a resẽ, i que Pilato mbia je ra. ¹⁵Mbia que tasẽ tasẽ ee ra. —¡Eiquia rei! ¡Embucha ira rese! i que mbia Pilato je ra. —¿Se ra jenderecua aiquia re? i que Pilato mbia je ra. —Urererecua mo eãte nyeresẽ. César mii ño nyeresẽ, i que sacerdote rerecua Pilato je ra. ¹⁶Aque mose que Pilato Jesús mondo mbia je cote ra. —Jëiquia. Jembucha ira rese, i que mbia je ra. Hue si que mbia Jesús ruruchoi cote ra.

Mbia Jesús mbucha ira rese cote

¹⁷Jesús que usẽ oso cruz resebe cote ra. Mbia que ecuruchoi ibi ibátee ra. “Eresa cuare” i que hue ibi ibate je ra. “Gólgota” i que judío cheẽ hue je ra. ¹⁸Huee que soldados Jesús mbucha ira rese ra. mbia nyeremo abe que embucha ira rese ra. Co mii Jesús ribisho quti. Enongue eribisho quti no. Jesús que emii eite re ra. ¹⁹Pilato que letrero mbesa ra. JESUS DE NAZARET REI JUDIOS RERECUA, i que embesa ra. Embesa ji que emii ibate Jesús ãquĩ nguiti ra. ²⁰Judíos tubiriã ngue chi mae embesa ji rese ra. Sucha tubiriã jiite quiatu ngue Jesús mbucha nguiã ira rese. Embesa ji que chĩ mbia cheẽ mbuae jaaja ra. Judío cheẽ. Griego cheẽ. Latín ñee. ²¹Sacerdotes rerecua que ñee ja Pilato je ra. —“Judíos rerecua” erechĩ nguiã embesa. “Judíos rerecua raã ñooño” ere chõ embesa mii ae, i rei que judíos rerecua Pilato je ra. ²²—Ae ambesa, sã ùquĩ ñi ño, i que Pilato judíos rerecua je ra.

²³Cuatro soldados que chi huee ra. Ùquĩ ngue Jesús mbucha ira rese ra. Ùquĩ ngue Jesús irao isirõ sirõ ja ra. Jesús irao mii ngue chichõ cote ra. Tejido turã tuchi que aque tiru ra. Eiasa eã tuchi que ra. Eao ji chõ eresebe que ra. ²⁴Soldados que ñee nyue ra. —Aque ra nandechisia eã. Sita ñetẽ nandesurubaba baba rã nandechue. Aba ra ja. Aba ra eirao querao ja, i que nyue ra. Sita ñetẽ ngue esurubaba baba uchue cote ra. Embesa ji cheẽ iquechĩ cote. Jesús irao soldados mbuchao chao mose. “Seirao que embuchao chao nyue ra. Sita ñetẽ ngue esurubaba baba uchue ra”, i que embesa ji huĩ nyii ra. Embesa ji iquechĩ cote.

²⁵Jesús mbuchasa ira rese que cuña mo chí ra. Jesús si que ra. Esi nongue abe que ra. María Magdalena abe que ra. Cleofas ninisi abe que ra. María, i que aque je ra. Ũquĩ ngue chí ja Jesús ji ra. ²⁶Juan abe que chí Jesús si ji ra. Jesús mae mose usi rese que ñee ee ra. —Taĩ, aque quia nderiirina cote, i usi je. Juan ñi eriqui ñee. Jesuubi tuchi quia ñi Juan nde. ²⁷—Aque ndesirã cote, i que Juan je cote ra. Juan ngue Jesús si querao bei uchuchua cote ra.

Jesús mano cote

²⁸—Achimbirãcuã tuchi que mbae ja je Dios cheẽ nguire ra, i que Jesús uchiangui re cote ra. —Seisei, i cote. ²⁹Vinagre mo ngue chí mbae mo ye huee ra. Mbia que esponja monde vinagre ye ra. Mondo que Jesús chúruu ra. ³⁰Jesús que vinagre mocõ esponja resenda cote ra. —Dios cheẽ ngue asaã ja cote ra, i que Jesús ra. Uãquí ngue embucheseco cote ra. Mano ngue cote ra.

Soldado Jesús cúa chiõ tiquise je

³¹Judíos que ñee nyue ra. —Ae embucha ji chí ira rese nae, sã ũquĩ chiã ira rese pascua mose huee, i que mbia ra. Pascua nonde que embucha ira rese ra. Mbia icoquiato mose pascua nonde. Mbia chumunuasa tuchi quiarei pascua. Sábado mose rei pascua. Nyebe mbia ñee nguiã Pilato je. —Sã soldados ira resenda timasiquio ja jẽ. Eĩ nda mano jei. Eĩ nda soldados ecuruchi sábado nonde, i que judíos Pilato je ra. ³²Soldados que nyoĩ ira resenda tima ndiquio ra. Ae chí Jesús rereco chobei. ³³Ngasẽ mose Jesús je, eraaquete que ee ra. Nyebe etima ndiquio eã nguiã. ³⁴Soldado mo ngue Jesús cúa chiõ tiquise je ra. Eruqui que uchẽ nda. Eri abe que uchẽ nda. ³⁵Nyebe aico nguiã ã mbesa mbesa a. Amae jee ngue erese re. Acheẽ ñooñoã se quia a. Eĩ nda jẽ abe “ae bei jẽ” jenyẽ Jesús riĩ. ³⁶Embesa ji cheẽ ngue ique cote ra. Jesús tima ndiquio eã mose. —Etima nda mbia siquio eã, i que embesa ji nyii ra. ³⁷—Ae embucha uquia ira rese nae, ũquĩ nda mae si erese, i abe que embesa ji huĩ nyii no nda.

Jesús ruruchoi eraaque atisa

³⁸José de Arimatea, i que emo je ra. Jesús rimba checuayã ngue ae ra. —Sã judíos jiranuã serese, i que equia uchiangui re ra. Ae que “Jesús rete embu seje” i Pilato je ra. Pilato que “eno” i ee ra. José que Jesús rete curuchi ira si cote ra. Ae equerao nguiã. ³⁹Nicodemo abe que tu erea ra. Ae tu ñee Jesús je isa nyii nae, aque. Aque que tu aba mbushĩmbusa tubiriã tuchi reru ra. Eraaque mbaerã ndei aba mbushĩmbusa. Ira shimbu turã mbucúĩ ji. Mbae a mbucúĩ ji abe no. ⁴⁰Ũquĩ ja que Jesús rete querao cote ra. José. Nicodemo ndese. Aba mbushĩmbusa resebe que eraaque uma uma tiru je ra. Eĩ mbei que judíos quia

mbia raaque je ra. Eati nonde. ⁴¹Jesús iquiasa rurubi que sita imi mo ñi nda. Eao ramo ji. Mbia raaque mondosa eã nyii. ⁴²Huee que Jesús raaque nduruchoi nyati ra. —Cochite quia sábadu ru nguiã nande je co, i que eati aichi chõ nda.

Jesús quera si

20 ¹Domingo mose que María Magdalena nyoi mae Jesús tãsa rese ra. Nyaasĩ nonde. Jesús atiquia nduruba ji que chi sita ra. ²Nyebe echoi nguiã uchã ñee Simón Pedro mbiirandu. Jesús chimbbaaquiato nongue abe mbiirandu. Ae Jesús quiato tuchi nae, aque. —Aba chõ nandererecua raaque sirõ suruchoi. Mangu eno mangu reae, i que María Magdalena nda. ³Nyebe Pedro si nguiã ea tiquia rea. Uquiato rese. ⁴Nyoi ja que uchã nda. Enongue rane ngue Pedro chucua oso ngasẽ nda. ⁵Nyibi que mae Jesús atiquia rese ra. I que Jesús umanda achõ u tiru ra. Ique tuchiã ngue oso sita imi ni nda. ⁶Aquere que Simón Pedro ngasẽ cote ra. Ae quiato que ique oso sita imi ni nda. Ae abe que mae Jesús umanda achõ ndese cote ra. ⁷Eãquĩ umanda rese abe que mae nda. Tiru ataque rese ja eã ngue eãquĩ umanda chi ra. Eacua ji que chi icuẽ ra. ⁸Ae rane ngasẽ nguiã nyii nae, aque abe que ique tuchi oso sita imi ni cote ra. Mae tuchi que Jesús oreã ndese cote ra. —Jesús quera chõ nguiã re, i que eicua cote ra. ⁹Ūquĩ ngue embesa ji icuayãte ra. “Jesús ra quera si”, i que eicuayãte ra. ¹⁰Nyebi si que echoi uchuchúaa ra.

Jesús nyecua María Magdalena je

¹¹María que chiño nyeseo eatiquia jii ra. Echeseo que nyibi mae Jesús rua rese ra. ¹²Angeles mo ngue chi huee nyeremo ee ra. Eiraoshĩ ja que chi ee ra. Enongue que chĩ ngoi Jesús ãquĩ ndúa qiti ra. Enongue ecuii rúa qiti no. ¹³Angeles que ñee María je ra. —¿Mbaerã ereico nyeseo re? i que María je ra. —Aba chõ sererecua raaque querao. Nyebe aico nguiã nyeseo. Mangu chõ eriqui ererequia mangu, i que María ra. ¹⁴Ucheẽ nduibe que mae ndei uquite qiti ra. I que Jesús uã ee ra. Icuã eãte que ra. ¹⁵—¿Mbaerã ereico nyeseo re? ¿Aba eresequia quia re? i que Jesús María je ra. Ira a raarõsa Jesús riqui reĩ nguiã María je. Nyebe María ñee nguiã ee. —¿Nde Jesús raaque ererao re? ¿Mangu erechono mangu re? Taso erea ae. Tarao ae, i que María ra. ¹⁶Jesús que “María” i María cheẽ mose ra. María que uba tuchi Jesús icua cote ra. Judíos cheẽ ño ngue María ñee Jesús je ra. —Raboni, i que ra. —Sembbaaquiatusa, i ñee Jesús icua re. ¹⁷Jesús que ñee María je ra. iSeisi jeichĩ nda re! iAso ãte Paba rea resẽ! Eso rã ñee senongue je. “Jesús que ñee jẽje ra. ‘Aso ra ibate Paba rea. Dios rea. Ae abe chõ jendu re. Huee ra aso’, i que Jesús ñee jẽje ra”, ere rã senongue je, i que Jesús ñee María je ra.

Jesús nyecua uchimbbaaquiato je

¹⁸María Magdalena que oso Jesús chimbbaaquiato mbiirandu ra. — Amaechĩ Jesús rese, i que ee ra. Jesús cheẽ ngue esenei ja ee ra. ¹⁹Aque

mose que domingo ra. Aque isa que Jesús chimbaaquiato chi ñumunua nda. Etaronda matã ji que chĩ nda. Siquichete quia judíos si re. Jesús que oso ique uchimbaaquiato mbuate ra. Eite re que esi ñee ee ra. —iJëya eãte jirichĩ nda jẽ! i que Jesús ñee ee ra. ²⁰Aquere que Jesús o iõsa reacuquia ee ra. Ucuã iõsa abe no. Echimbaaquiato ía tuchi que mae Jesús rese ra. ²¹Jesús que ñee si ee ra. —iJëya eãte jirichĩ nda jẽ! Sã ñi Paba sembu no, eĩ tae si jemondo secheẽ nenei nenei sacua mbia je, i que Jesús uchimbaaquiato je ra. ²²Jesús que uchimbaaquiato ichu ñee nda. —Espíritu Turã ndu jëje a cote, i que eichu ra. ²³—“Dios chõ jëicuã mbutiã nguiã jësi co”, jenyee mose emo je, Dios ra ñiquĩ icuã mbutiã esi cote. “Dios chõ jëicuã mbutiã eã nguiã jësi co”, jenyee mose emo je, Dios ra ñiquĩ icuã mbutiã eã esi, i que Jesús ra.

Tomás mae Jesús quera si rese

²⁴Tomás oreãte que Jesús nyecua mose uchimbaaquiato je ra. Jesús chimbaaquiato raque Tomás. Eata, i que Tomás je ra. ²⁵—Jesús rese que uremae nda, i que eataque embiirandu ra. Tomás que ñee nda. —Jesús eã ndei e. Se mae eã mose eo iõsa rese, se ocoã mose eo iõsa rese, se ocoã mose ecua iõsa rese, “nyia” aeã nda se, i que Tomás ñee nda. ²⁶Jesús chimbaaquiato que ñumunua si domingo nongue mose ra. Tomás abe que siqui uataque rese huee cote ra. Etaronda matã ji que chĩ nda. Jesús que ique oso ra. Eite re que esi ñee ee ra. —iJëya eãte jirichĩ nda jẽ! i que ee ra. ²⁷Ñee ngue Tomás je cote ra. —iSã seo jẽ! Seo iõsa rese eco. Secua iõsa rese abe eco ae. “Jesús quera si eãte” iere sichĩ nda jẽ! “Jesús que quera si ra”, ere chõ cote, i que Jesús ñee Tomás je ra. ²⁸—Sererecua. Nde rei sembae Dios, i que Tomás Jesús icua cote ra. ²⁹Jesús que ñee Tomás je ra. —Nde mae mose serese, aque mose chõ seicuachĩ. Mae eã mose serese chõ ngue emo ndiqui seicua ra. Ñiquĩ nguiarei eya tuchi ndesi, i que Jesús ee ra.

Je Jesús icua sacua ño co ambesa nguiã jëje

³⁰Jesús que mbia mae sayã saã saã tuchi uchimbaaquiato je ra. Ñiquĩ ambesa ja eã nguiã a. ³¹Ñã nguiã ambesa ja quia a. Jẽ Jesús icua sacua. —Jesús rei Cristo. Jesús rei Dios rucucha, jenyee nda chã. Ñiquĩ icua mose ra jëingo bei.

Jesús nyecua sietechimbaaquiato je

21 ¹Aquere que Jesús nyecua si uchimbaaquiato je ra. Ama nimia ndese que eñi nda. Tiberias, i que aque ama ndisa je ra. Eĩ ngue Jesús uã nyecua ee ra. ²Echimbaaquiato que chi nyiese ra. Simón Pedro. Tomás ndese. Ae je eriqui “Eata” i. Natanael ndese. Caná de Galilea jenda rei Natanael. Zebedeo riirĩ abe que chi ra. Echimbaaquiato nongue abe

que chi nyeremo no nda. ³—Taso rã sira rea, i que Simón Pedro ra. —Ure abe ra ureso nderese, i que eataque ee ra. Nyoï ja rei que sira rea ra. Nyui ja que echoï canoa ye ra. Sira que embua mbua eãte aque isa ra.

⁴Jesús que chĩ erimia ndese echimbaaquiatu je ra. Jesús eã eriqui reĩ nguiã ee. ⁵—¿Sira mo jembua re, Ñquẽ? i que Jesús ñee mombo ee ra. —Tei, i que echimbaaquiatu ee ra. Jesús icua rocoï. ⁶—Sira mbua mbuasa jenduba canoa quiato cuti. Sira ra jembua cote, i que Jesús ee ra. Jesús cheẽ ngue emumbayã nda. Sira que ua jate embua mbuasa ye cote ra. —Nandenosẽ ama si. Nandechuchã canoa ye, i rei que ra. Eusite que ee ra. ⁷Ae Jesús quiatote, aque que ñee nda. —Jesús chõ eriqui re, i que uataque je ra. Pedro eandu mose que huiïrao mingue asi oso ii ra. Jesús rea. Sira mbua mbua nonde quia huiïrao mbui nguiã nyii. ⁸Isho tuchiã ngue ama nimia nda. Cien metros chõ ngue ra. Pedro ataque que canoa querao ama nimia ndiichã nda. Sira mbua mbuasa que ecuruchoï quia mbutiriri sira resebe ra.

⁹Nguichi que canoa si ibi rĩ cote ra. I que tata u ee ra. Sira mii ngue chi tata rĩ ee ra. Mbichae abe que chi ra. ¹⁰—Sira mo jendu rã. Ae jembua ramo, i que Jesús uchimbaaquiatu je ra. ¹¹Simón Pedro que nyui oso canoa ye ra. Sira mbua mbuasa que embutiriri serao sonosẽ ama nimia ndese cote ra. Embisẽ sira resebe. Sira mbua mbuasa que soroãte enonosẽ mose ra. Sira cuasu achõte raque. Sira 153 raque. ¹²—Jenyu quiaru cote, i que Jesús ee ra. —¿Aba nde re? i ãte que emo ñee ireï nguiã ee ra. Mbia que Jesús icua jate ra. ¹³Jesús que oso tátaa cote ra. Mbichae que esirõ nda. Mbuchao chao que uchimbaaquiatu je ra. Sira abe que embuchao chao ee ra. ¹⁴Jesús que mano nyii ra. Quera si que ra. Nyecua nyecua que uchimbaaquiatu je cote ra. Co rei tercera vez co.

Jesús ñee Pedro je

¹⁵Quiaru jare que Jesús ñee Simón Pedro je ra. Jonas ndiirĩ ndei Simón Pedro. —Simón, ¿erechesequa tuchi quia serese ã si re? i que Jesús Pedro je ra. —Ae. Achesequa tuchite sequia nderese co resẽ. Seicuate se resẽ, i que Pedro ñee ee ra. —Oveja raarõsa rã eico no. Seicuasa embaaquiatu quiatu quia secheẽ je no, i que Jesús Pedro je ra. ¹⁶—Simón, ¿erechesequate quia serese re? i si que Jesús ñee Pedro je ra. Pedro que ñee ee ra. —Ae. Achesequa tuchite sequia nderese co resẽ. Seicuate se resẽ, i si que Pedro ñee ee ra. —Oveja raarõsa rã eico no. Seicuasa esaarõ turã nguia no, i que Jesús Pedro je ra. ¹⁷—Simón, ¿erechesequate quia serese re? i si que Jesús ñee Pedro je ra. Co que tercera vez cote ra. Jesús ñee tres veces mose que Pedro ía eã tuchi ra. Pedro que ñee ee cote ra. —Mbae ereicua jate quia co, Sererecua. Achesequa tuchite sequia nderese co resẽ, i que Pedro ñee Jesús je ra. —Oveja raarõsa rã eico no. Seicuasa esaarõ turã nguia no. ¹⁸Tacheẽ nyecua ndeje, Pedro. Ndeyasu mose que

ereico ndeirao mingue oso ngata chooño ndesose quiti ra. Nde amei mose ra ndechiba ereira cote. Mbia ra ndecua cote. Ndeso sere ãsa quiti ra mbia nderuruchoi cote, i que Jesús Pedro je cote ra. ¹⁹—Eĩ nda mbia Pedro iquia, i chõ Jesús re. —Eĩ nda Pedro Dios quirãcuã ndeacuquia mbia je, i chõ Jesús re. —Eico serui, i que Jesús Pedro je cote ra.

Ae uchimbaaquiatu rese Jesús nyesecua tuchi

²⁰Pedro que uba mae serese cote ra. Se rei Juan. Jesús nyesecua tuchi rei se. Se chõ ngue acoi huĩ quiaru Jesús jii aque isa resẽ. Se chõ ngue “¿Aba ra nemeẽ mbia icuã je re?” ae Jesús je resẽ. ²¹Pedro que mae serese cote ra. Ñee ngue Jesús je cote ra. —¿Mañi ite ra mbia quia Juan je re? i que Pedro Jesús je ra. ²²Jesús que ñee ee ra. —¿Mbaete ere? Serui chõ eicochõ nde. “Sechube mose chee ra Juan manoã”, se i mose, manoã ndae. Eico chõ serui nde, i que Jesús Pedro je ra. ²³—Juan nda manoã mbeichĩ nde, i que Jesús icuasa Juan nii cote ra. Jesús cheẽ abi chõchĩ. —Juan nda manoã, ire rocoĩ Jesús nyii. —Se cheẽ mose ra manoã, i chõ ndei ngue Jesús re. —Juan nda manoã, i ãte que Jesús ra.

Juan ñimbesa hui bei

²⁴Jesús chimbbaaquiatu chõ se re. Se chõ ã ambesa ja nguiã. Amae jate que se quia Jesús chisaã ndese ra. Acheẽ ñooño eãte se quia ã mbesa mbesa co. ²⁵Jesús chisaã saã tubiriãte quia ñene. Ambesa ja aroneãte quia a. Jesús chisaã saã mbesa ja mose, eĩ ndei ra papel mbesa ji mbia recua mbiitayã jate. Amén.